


BAHIBURI, UNTU GWĀKWÁNDÁ

 Kangi ukupa i—i linini...Une ngwinogona kikayapo nakimo ikinunupo, kwa une, ukukinda itolo i Lisyu. “Ulwitiko lukwisa nu kupilika, kangi ukupilika i Lisyu lya Kyála.”

² Pa Fitatu, kangi lumo Pamilungu, lumo mwa ngomano sya Pandungu, ukumpa untimi itolo ubutusyo panini, iki umwene ikulondigwa fiyo ubwa ubwene, kangi twālinogwīne lumo uswe itolo tubagile ukwēga u Būku mu i Bāngéli. Uswe twālisibile ukubōmba ikyo, kangi utubalilo tumo ukuya pa kyēne ikyīnja kyōsa.

³ Une ngukūmbukila akabalilo kamo uswe twālitūgēsye ikyīnja kyōsa pa Būku gwa Busetuli. Lōli, o, mwe, ifindu ifi uswe twāmanyile, kangi mūmo kyāyīlile ubununu ikyēne! Polelo uswe tusulukeye nukwakwēga u Buku gwa Daniel, pamo Buku gwa Bwandilo, pamo Ukusoka, kangi itolo ukwēga ilyēne, untu ukufuma pa ntu, kangi ikyēne kukupinya i Bāngéli lyōsa palikimo. O, une ngukigana itolo ikyo!

⁴ Ukufuma apa panini, uswe twisakwēgāga i...Linga u Ntwa ikukīndilīla ukusaya kangi uswe tukukīndilīlāga, uswe twisakwisaga mu findu fimo ifisolofu naloliloli muno, naloliloli fisolofu. Kangi uswe tukubukaga ukufuma pa buyo ukubuka ku buyo ukwisila mu Lisimbo, ni kyēne.

⁵ Kangi une niganile ukutēdeka i Lisimbo likufwanikisania ni Lisimbo. Umo mo mūmo ikyēne kibagile ukuya. Ikyēne kyo itolo kimokyēne ikipiicha ikikulumba ikinywamu ikimogi. Kangi mwa Būku uyu uyu uswe tukufūnda, uswe tukuyaga ukwingilamo, o, bupoki, kangi ububūmbulūsyo Bwamwakyala, ni fika, ni fisa. Kangi, o, filifyosa fikwisa muno.

⁶ Kangi lumo akabalilo kāko une ngufika ku buyo kūko une ngufimbilisigwa ukuya ni ngomano...Une ndikumanyamo siku itolo mo ndili une nguyaga nu lukomano, ukukōlēlīgwa ku lukomano, panongwa yakuti une ngaya nakyō kalikosa aka kabikīgwe mpaka une itolo ngwipilika ukulōngosigwa ukubōmba akandu kamo. Kangi ikyo kibagile ukuya bo kukāli ndubunju, une mbagile ukwenda pa ndēge ukubuka ku California, ukufyūka ku Maine pamo kubuyo bumo, itolo kūko Umwēne abagile ukungōlelāga une. Iyo yo nongwa une ndikubika ulusanjo inywāmu, indali isya mabulēndo mma, panongwa yakuti une ngabagila ukubomba ikyo. Ubutumigwe bwāngu bukabūmbigwa mōsa bo ulo umma, kangi ubwēne bo itolo bukīndane.

⁷ Kangi lilino une ngwisa ku kāya itolo ku butusyo ubunini. Une nāgāndīle ukusuluka amapaundi malongo mabili, mu

lukomano ulu lukindile. Kangi Nkundwe Mercier nu Nkundwe Goad ali apa, akabalilo kanini aka kakindile, kangi alinkuti, “Nkundwe Branham, une nguketesya iki ugwe kubomba. Ugwe kubika indumbula yako yosa pa kyène.”

⁸ Une ndinkuti, “Iyo yo njila yène ugwe ubagile ukubomba uluko ulutalusye lwa mbombo ya Ntwa, ko kubika kilikyōsa ugwe uli nakyo kulakula ku nkyēni panongwa ya Kristi; amaka gāko gōsa, umoyo gwāko gōsa, indumbula yāko yōsa, ilinogono lyāko lyōsa, kilikyōsa iki ugwe uli nakyo.” Akabalilo kāko ugwe kubōmba kalikosa, bombāga ikyēne kanunu pamo komma ukubōmba ikyēne napanandi, muketile, kileka itolo kyēne. Linga ugwe kwisa ukuya Nkristi, bika kilikyōsa ito ugwe uli nakyo kwa Kristi, ikyo kyo, kabalilo kāko, ulwēke lwāko, ikyāko kilikyōsa.

⁹ Une itolo nakētésyāga umwinitu unnini uyu. Uyo yo nkasi gwāko, Nkundwe Burns, bule, yula ukukiba nukwimba pala, undume-nu-nkikulu abakeke bala. Kangi—kangi ikyēne kikaya piano, kangi ikyēne kikaya orogani, lōli ikyēne kyo luko lumo lwa kyōmbo, abēne bikutēndēka ukukuba ikyēne nukutita ikyēne, nukubōmba ikindukimo kwa Ntwa. Lumo umwe mubagile ukubōmba ikyo, nukwimba, uko ko, kaba imyoyo. Bōmba ikindukimo, kisita kupāsa. Linga ugwe—ugwe ubagile ukukuba ulupufi, ena, pufya. Itolo bōmba ikindukimo. Itolo yobela pamo bōmba ikindukimo ku Kitangalala kya Kyāla. Kilikyōsa ugwe uli nakyo, kibika ikyēne ku bubōmbélo mu bubōmbélo bwa Kyāla.

¹⁰ Lilino, uswe tutikubūkāga ukwitūgāsya akabalilo akatali fiyo mma, panongwa yakuti une mmenye mukubōmba. Umwe mukufimbilisigwa ukusumuka ukwāndāna. Kangi une ngubūka ku kufwima abalukoti ulubunju lulilosa. Une ngubabūlāga umwe u bwanaloli. Ikyo kyo iki une ngubōmba. Ikyo kyo iki une nīsile kukāya, ko kutūsya panini. Kangi popāpo une ngusumuka, kifuki isala ya buna kulubunju, kangi ngubūka panja mmatengele kangi, ena, ukufwima panini nukubūka ukugona utulo. Kangi une nāndile ukukaba bumo mwa busito bula kangi, popāpo une nguyapakūtūsya, ukufuma pa kabalilo, linga umwe. . . u Ntwa itikisyege. Kangi filifyosa fili kanunu.

¹¹ Syosa silikanunu, lilino, uswe tukusanukaga mu i Bāngéli. Une ngulōnda umwe ukutwāla ama Bāngéli ikilo kili kyosa, ukuti umwe. . . mumo umwe mubagile. Linga yumo ikufumbwa amanandi, abagile yumo ukulonda ukukōngēsya mula nu bubale, uswe tuli nago gamo apa, uswe tubagile ukuya ni. . . bamo mwa bāmbilila-bahesya ukuyabania agēne mōsa. Aligwesa ikulonda yumo? Ena, itolo fyusya ikiboko kyako.

¹² Nguswīga linga Nkundwe. . . Doc, ugweisa kuno nukwēga amaBāngéli aga. Ugwe gwīmīle kifuki kula, kangi Nkundwe Burns. Ngimba ikyo kitakusye, Burns? Une numpilike umwēne

ikuyoba...[Unkundwe ikuyoba, “Conrad.”—Nsimbi] Fiki? [“Conrad.”] Conrad. Une nunkólíle umwène...Une ngufika luko lwa bukafu bwa kupilika, lumo, Nkundwe Neville. Ngimba une njágíle bulebule ingamu yila iya Burns? Une nkimenye ikisyo kya nnyámbala yula, kangí une itolo ngabagíla, ngabagíle ukukóléla ingamu yáke.

¹³ Kangí umwe mumenye, bo ugwe kufika ukuya nkangale panini, une ngukyágánia ikindu kimokyéne, ikyéne kikafu kuli une ukubala i Bángéli ili. Kangí une itolo nkibéngíle ukwinogona ukuti kufímbilisigwága ukufwala amandalasi, ukuti ubale i Bángéli.

¹⁴ Lóli, apa pakaya patali mma, une nālinogwíne une nayaga pakuya mfwamaso. Kangí une ndinkubúka kula ukwakwágána na Sam. Kangí Sam alinkuti, “Bill, une ngamanya.” Alinkuti, “Une itolo ngukwagilaga ugwe ululagano na yumo ungang’ugwapasima.”

¹⁵ Une ndinkubúka ku Louisville. Ubwéne bwabagíle ukuti bwáli bwígáne bwa Ntwa. Yumo umfumke ungang’ugwapasima; une ngwíbwa ingamu yake lilino. Loli umwene ábalile buku gwāngu. Kangí umwene alinkuti, “Linga ugwe gwabukaga kangí ku Afrika, une ngulonda ukubuka na ugwe.” Umwéne alinkuti, “Kangí linga ugwe... Abāndu ba Afrika bala bakuganile ugwe.” Kangí alinkuti, “Abéne bo bānyiho fiyo, fiyofiyo nu mmāge, ukubúka ukutumula. Popāpo,” alinkuti, “Une ngulōnda ukupa imyesi mihano na gumo igya būmi bwāngu, panongwa ya bupānje bwa inyānga ni findu, ku i...mu butumigwe.” Kangí alinkuti, “Linga uswe twābagíle ukubōmba palikimo, kangí ugwe gwābagíle ukukaba ubukūndwe bwa bēne, bo ulo,” alinkuti, “polelo linga abéne bāli ni nyānga kangí ni mbombo sya fisige,” alinkuti, “Une itolo angali nkiganile ukupa ikyéne, kyaitolo kisita kuhōmba, imyesi mihano na gumo gya ikyéne.” Kangí une ngwíbwa ko kabalilo katali nki ugwe kufimbilisigwa ukugúlíla ukuya nu lulagilano nu mwéne.

¹⁶ Kangí uswe twālitūgésye nkyūmba ikinini kangí ikyéne kyāli nakyó akanini—akanini akalumuli akakesefu ukwāsya, kunyuma kula nkyūmba ikyāngísi. Fiki, une nābagíle ukubala amasimbo. Ikyéne kilinkuti malongo-mabili-malongo-mabili. Une ndikubagíla ukubala ikyéne injila iyi na iyi. Kangí umwéne alinkukoma ikyéne pa kalongo na kihano-kalongo na kihano, kangí une ndinkubagíla ukubala ikyéne. Kangí ukubíka ikyéne pa kalongo-kalongo, kangí une ndinkubagíla ukubala ikyéne. Umwéne alinkuti, “Mulimosa, kikayapo kingi fiyo iki kitamisye ni fisige fyáko.”

¹⁷ Popāpo umwéne āli nako aka teleskopu akanini. Umwéne alimkubíka akōmbo akanini kunyuma kula, akandu akanini, umwe mumenye. Gala agaiyolo amateleskopu, balinga bikukumbuka agéne siku? Uswe twālisibíle ukukételamo

agêne, ukukêta amapiicha, itolo bo ulo. Kangi umwene alinkuti, “Ngimba ugwe ubagile ukubala ikyo?”

Une ndinkuti, “Ena, nkulumba.”

Umwene alinkuti, “Bala ikylene kwa une.”

¹⁸ Ikyêne kyâli ni, o, ikiyabo kyôsa, kifuki bo *ulo*. Une ndinkwânda, ukubala ikylene; umwene alinkwânda ukukikwâbila ikylene mmwanya, bo *ulo*, ukwisa ukuya nkololofu kangi nkololofu. Umwe alinkufika kifuko bo *ulu*, une ndikwîma. Umwene alinkuti, “Une mbagile ukukubûla ugwe ikindu kimokyêne, ugwe ukîndile malongo mana.”

Une ndinkuti, “Ena, uko kotalusya, kubutali fiyo ngîndile ukwêne.”

¹⁹ Umwene alinkuti, “Ngimba ugwe ubombile bulebule ikylene?” Umwene alinkuti, “Ikisige kya mûndu, nkipeligwa, akabalilo kâko ugwe kufika ku malongo mana mbukusi, ngati inywîli sikufika mbuha, na fyosa bo ifyo, umpila gwa kisige kukufika ukuya gwângâbya.” Alinkuti, “Lilino, linga ugwe kuya mûmi kubutali ukufwâna, ikyo kisakwisa ukugomokela kangi.” Umwene alinkuti, “Ukukêta kwakibili kula, abêne bikukukôlêla ukwêne. Lôli,” alinkuti, “u mûndu, kifuki ifyînja malongo mana mbukusi, abêne bisa fiyofiyo. . . .” Alinkuti, “Kikayapo nakimo iki kitamisyè ni fisige fyâko.”

²⁰ Une mbâgile—une mbâgile ukukêta ulunywîli linga ulwêne lwâlambelele pa kipâlo, ukusôkâpo ukufuma kwa une. Lôli fika kifuki kwa une. . . . Kangi umwene alinkuti, “Lilino, ugwe kubala i Bângéli,” alinkuti, “ugwe kuligutula ilyêne kubutali na ugwe.” Alinkuti, “Ukufuma pa kabalilo, ulukôngi lwâko lutisakuya lutali nukufwana mma, mpaka ugwe ukabagila—ukabagila ukukifikisya ikylene kubutali kula ukuti ukikôle ikylene.”

²¹ Kangi popâpo umwene alîndêndike une amandalai, kangi pa kiyabo kya pâsi ugwe ubagile, ikylene kyo kwa kubalila. Umwene alinkuti, “Lilino, mu kigemo kyâkê. . . .” Umwene alinkwinogona une nâli yumo gwa balûmbilili aba abayîndikîgwa, umwe mumenye. Kangi popâpo alinkuyoba ukuti i. . . ugwe. . . . Ikiyabo kya pamwanya kyo itolo ndalasi lya madirisya, itolo indalasi lyapaliposa. Kangi ikiyabo kyâpâsi kili nu luko lumo lwa busyâno mu kyêne, iki une mbagile ukubala pabupipi, umwe mumenye, bo *ulo*. Popâpo une itolo ngabengile ukugafwâla agêne; une ngubômba.

²² Kangi lilino, mu bmanyisi bwa i Bângéli, kangi une ndinalo Ulwîtikâno Ulupya ikilo iki. Popâpo ikylene kyo. . . . Une ndinalo Ulwîtikâno Ulupya lwa Collins kangi ilyêne lili na masîmbo amanywamu-kanunu. Lôli lilino, akabalilo kâko une ngugomokela mu lîngi limo, une—une lumo ngufîmbilisigwaga ukubûka ku binangu abaiyolo bala, kangi—kangi mu luko lumo ukubala ukwisila mu bêne. Lôli kilikyosa ikylene kili, une—

une ndi nsangalufu une ndinakyo ikindukimo une—une mbagile ukubala pōpe. Kangi—kangi—kangi kilikyosa iki une ndinakyo, une ngubūkága ukupa aligwesa kilikyosa une mbagile, ku lwīmíko lwa Kyāla, ngusūbila ukuti Umwēne isakwégága ikimanyilo kya bukāngále kila ukusōsyápo. Une ngabagila ukunsuma Umwēne ukusōsyápo ubukāngále. Une. . . Ena, ikyo kyo itolo kindu kimokyēne uswe tubagile ukubomba. Uswe tukufimbilisígwa ukukindamo mu kila. Kangi une mmenye une ngaya ndumiana nnini mūmo une nāyilile, nimege apa pa kigemo. Une ndi ni fyinja malongo mana na lwēle mbukusi. Kangi itolo inogona, ifinja fibili ukongelélápo, fisakuyaga fyinja malongo mahano mbukusi, Nkundwe Mike.

²³ Mwe, ngabagila kifuki ukwitika ikyēne! Une itolo. . . Une ngāmēnyémó siku ukuti une nākīndīle malongo mabili mpaka kifuki fyinja fibili ifi fikīndīle. Uko ko kutalusya. Uko ko kutalusya. Une itolo. . . Une ngābagile ukwītika ikyēne. Kangi pōpe une—une. . . Ikyēne kikafu kuli une ukwītika mpaka nākētīle mu ndalasi, kangi polelo une—une ngumanya ikyēne kili polelo. Lōli—lōli itolo ukukēta, une itolo ngwipilika itolo ukuya nnunu mūmo une nālipilikilémó siku mbumi bwāngu, kangi une ndigwakupālīsyá panongwa ya ikyo, kangi. Ulutufyo lōsa luyege kwa Kyāla.

²⁴ Lilino, uswe tukufunda u Buku gwa Bahiburi. Ilyēne liyīle. . . O, ilyēne lyo limo mwa masolofu ukukīnda, amakabi aMabūku ga i Bāngéli. Une ngubabūla umwe, ilyēne lyo i Būku ili naloliloli lisaku. . . Linga Kyāla ikwitikisya, kangi uswe itolo tukufikaga pāsi mu iki, une ngwitika uswe twisakutwāgamo utunyāfu twagolidi mpaka uswe itolo twisakulāta indūfyo kwa Kyāla akabalilo kōsa. Kangi lilino une. . .

²⁵ Ili Būku lya Bahiburi, nalolilo iki Ilyēne lili, Ilyēne libagilīle ukuya lisīmbigwe na Mwikemo Pauli, unkulumba unkīnde unsetuli gwa i Bāngéli, une ngusakikisya, ikīsu kyalimo nagwe siku, panja pa gwītu Ntwa Yeso Kristi. Kangi Pauli āpāgulāga i. . . Lilino, Pauli āli gwanaloli mmanyisi gwa i Bāngéli; uko kokuti, u Lwitikano Ulupya. Ilyo lyo lyēne i Būku lyāsimbigwe akabalilo kala, likukōlelīgwa i Bāngéli. Kangi umwēne āgelāga ukunāngisya ku Bahiburi, ukupagulania u Lwītikāno Ulukūlu nukunāngisya u Lwītikāno Ulukūlu ukuya nsyūngūlu pamo ikwakwegelela kwa Ulupya.

²⁶ Palapala pala uswe tubagile ukutika ulukīndi lwa kukāya nukwitūgāsya imyēsi mitatu palapala pala pa līnogōno limolyēne lila, palapala pala. Ukubūka kulakula ukugōmokēla, linga uswe twābagile ukusanukila mMabāngeli gītu lilino, mōmumo uswe tuli pa Bahiburi, unto gwa 1. Lōli linga uswe tukusanukila ku Busetuli, unto gwa 12, umwe mubagile ukukibona ikyēne nubupelesye kangi, mūmo imisyūngulu. Linga. . . umwe mwe muli ni fisīmbligo kangi mukuyaga pakusimba a Masīmbo. Mwa Bahib-. . .

²⁷ Mu Busetuli 11, uswe tukusyāgānia ukuti Yohani, pa lusungu lwa Patmos, ālīmbwēne unkikūlu imile mmwānya, kangi umwēne āli ni lisuba ku ntu gwāke kangi umwēsi pāsi pa njayo syāke. Kangi unkikūlu yula āli mbubabe, nu mwāna ukuti apāpīgwe. Umwēne alinkupāpa u mwāna unyāmbāla. Inyīfwīla ingesefu yilinkwīma, ukummōnanga umwāna yula akabalilo kāko umwēne ātīgi apāpīgwege. Kangi u—u mwāna alinkunyakilīgwa mMwanya, kangi unkikūlu alinkubopela ndulangalanga kūko umwēne āswiligwāga ku kabalilo, akabalilo, kangi sinda gwa kabalilo, pamo ukuyabania kwa kabalilo.

²⁸ Lilino, unkikūlu alīmīlile ikipanga, kangi u Mwana yula āpāpīle ali yo Kristi. Umwēsi pāsi pa njayo syāke lwāli lulāgilo, kangi ilisuba ku ntu gwāke lyāli ipyāna. Indondwa kalongo na sibili syāli batumīgwa kalongo na babili. Kangi apa po pāla, ku iki. . . Abatūmīgwa kalongo na babili bāli lwīmīko pamo ukufwīkīgwa ingiga kwa Lwītīkāno Ulupya. Muketile? “Kabuno nasimo inyālo isi sibagīle ukwālīgwa ukukinda isi sitalīle syālīgwe.” Muketile? Ulwēne, u Lwālo, u—u Lwītīkāno Ulupya, abatūmīgwa, i Kimanyisyo kya batūmīgwa, na fyosa bo ifyo, yo ngiga iyālwālo iya Lwītīkāno Ulupya. Kangi polelo ku. . .

²⁹ Umwēsi go nsyūngūlu gwa lisuba. Ilisuba likundalika itolo ubwēlu bwāke akabalilo kāko ilyēne lili kunyuma ku kīsu. Kangi u mwēsi gukupa ubwēlu bwāke, ukwēndamo, pakilo. Kangi kyo kipiicha ikimogi bule uswe tulinakyo apa, ipiicha iyīngi immogi: ilisuba likwīmīlīla Kristi; u—u mwēsi gukwīmīlīla i Kipānga. Ifyēne fili itolo bo undume nu nkāsi. Kangi mukusitakuyapo kwa Kristi, i Kipānga kikundalika u Lumuli ulunini, i Nongwainunu. Kangi ubwēne—ubwēne bo Bwēlu ukwēndāmo mpaka u Mwanundumiana ikufyūka kangi, polelo i Kipānga nu Mwānundumiana, umwēsi ni lisuba, fikōnganania palikimo. Muketile? Umwēsi go kiyabo kya lisuba, kangi i Kipānga kyo kiyabo kya Kristi. Kangi akabalilo kāko ukusitakuyapo kwa Kristi, i Kipānga kikundalika u Bwēlu Bwāke. Kangi polelo nu busisimikisye būbo uswe tubagīle ukukēta u mwēsi gukumulika, ugwēne gumenye ilisuba likumulika kumo. Kangi akabalilo kosa Ikipanga kyaakongesyaga Lumuli lwa Kristi, Kristi yo mumi. Amenī. Inogona isya ikyene.

³⁰ Lilino, u lulāgilo lwāli kyākwīmīlīla kya ipyāna, lōli u lulāgilo lukāli na maka ga bupoki mu lwēne. U lulāgilo lwāli itolo u. . . U lulāgilo lwāli u gwāpolisi. U gwāpolisi ākubīkīle ugwe mminyololo, lōli, ugwe ukētīle, ikyēne kyālyēgīle ilipyāna ukukwēgako ugwe ukufuma ku minyololo. Muketile?

³¹ Popāpo i Lilopa lya Kristi, i Nongwainunu, likutuponesya uswe ukufuma ku butulwanongwa. U lulāgilo lukutupela itolo ukuya batulwanongwa. U lulāgilo itolo lwātīle, “Ugwe gwe ntulwanongwa. Ugwe ulingisa kwībamo. Ugwe ulingisa kulogwa

ubulogwe. Ugwe ulingisa kuya nkēti gwābusyóbi.” Muketile? Ulwēne yo gwāpolisi uyu ikuyoba ugwe uli nsobi kangī ugwe utobesígwe. Lōli i Nongwainunu yo nongwa inunu. Kristi āfwīle ukutupoka uswe ukufuma ku fyosa ifwa ngilanio syitu, insobi sya lulagīlo. Kristi āfwīle ukutusōsyámo uswe.

³² Lilino, Pauli, nakalinga itolo bo umwēne apīndwīke, umwēne akālālwisýémo siku ku seminale, pamo nukuti ukwangalamo na balūmbilili balibōsa. Lōli ngimba umwe mukētēsísye? Umwēne āsulukīle kula mu Arabia, kangī āli kula ifyīnja fitatu, mu Arabia. Lilino, iki kyo, mminogono gāngu, ukuti . . .

³³ Lilino, uswe tukufimbilisígwa ukulwāga ulwālo lwa iki, popāpo uswe twisakumanya mūmo kiyīlīle ikyēne ukuya kyāmbombo. Kangī akamanyisyo kakwānda, ikilo iki, uswe tukwēgāga ulwālo.

³⁴ Lilino, Pauli āli mmanyisi gwa i Bāngéli gwa luko, panongwa yakuti umwēne āmanyisígwe pāsi pa unkulumba, mfumuke akabalilo-kōsa Gamalieli. Kangī umwēne āli yumo mwa bafumuke ukukinda aba lisiku lila, ummanyisi unkulumba yula ugwa lulagīlo na basololi. Polelo, Pauli āmanyisígwe kanunu mu ifindu ifyo.

³⁵ Kangī polelo une nunganile umwēne mu njila iyi, ubusetuli ubukulumba ubu, ukuya gwabwanaloli mu ndumbula, u ngogī, ālītíkísye kūfwa ya Stefani kangī ākētīle Stefani ikufwa pāsi pa mabwe ni sangalabwe ukufuma kukutūnyígwa ku bufwe. Une ngwinogona ikyēne kyābagīle ukufika kifuki kwa Pauli akabalilo kāko umwēne ālimbwēne Stefani ikufyūsya amaboko gāke ku Mwānya, nukuyoba, “Une ngukubona ku Mwānya kwīgwīke. Une ngukēta Yeso imile pa kiboko ikitalusye kya Kyāla.” Kangī umwēne alinkuyoba, “Tāta, komma ukubika inongwa ya butolwanongwa ukulwana na bēne.” Kangī umwēne alinkugona utulo.

³⁶ Ngimba umwe mwakētēsísye ikyo? Umwēne akāfwīlémo siku. Umwēne āgonīle utulo. Itolo ngati. . . Une ndikwītīka mma umwēne ālipilíkémo siku ilibwe ilīngi. Itolo ngati u mwāna pa kipāmbāga kya nna, ikugona utolo, Stefani alinkugona utulo mu ngongi sya Kyāla.

³⁷ Kilipo ikindukimo, ukufwana na Pauli, iki kyāli kifuki nu mwēne. Polelo umwēne, u mūndu aligwēsa pāsi pa butobesigwe, ikugela ukulwāna ni Kyēne, umwēne ukubopela kula ku mputi nkulumba nukwēga abakalata bāmo. Alinkuti, “Une ngwisakubakolaga abandu aba bōsa aba bikupela unjwēgo gosa gula, kangī bala abasāmbuke;” aba begigwaga ukuya, iki uswe tubagīle ukukikōlélā umwīsýúgu, “abūmilisi abasitakukolīgwa,” pamo ikindukimo bo ikyo, ukupela unjwēgo gu mwīngi nukutēdeka ulufubānio. “Uswe tukusulukāga itolo nukwakubatamisya ikyēne.”

38 Kangi pa nsebwe gwāke ukusuluka, akanini akaiyolo... komma unkulumba unwebwe gwapamwanya ngati ugu uswe tukwëndámo mma. Kangi imisebwe gila mu Palestina, itolo utuyila utunini, ngati injila ya ng'ombe ukukinda mmatengele kũko ing'ombe, kangi ing'osi, kangi i falasi, kangi i mbũnda, kangi i kameli, syābũkága pamwanya pa twāmba.

39 Polelo Pauli, ba nsebwe gwake ugwa ku Damaska, kifuki pamũsi, ilisiku limo, u Bwēlu ubukulumba bukumulika pāsi kangi bulinkūtíkila umwēne pāsi. Nayumo ābubwēne Ubwēne lōli Pauli. Une ngulonda umwe ukukētésya ikyo. Kangi papapa apa, iki kikaya kuti nguyoba sya yumo mma, lōli itolo ukuti uswe tulongolele mu lwālo ulu. Ukuti umwe mukumanyaga ukuti Yeso yulayula... .

40 Lilino, akabalilo kāko Umwēne āli apa pa kīsu, Umwēne alinkuyoba, “Une nīsile ukufuma kwa Kyāla, kangi une ngomokela kwa Kyāla.”

41 Lilino, akabalilo kāko Umwēne ālongolile abāna ba Israeli, Umwene ali yo Mbānda ya Mōto. Kangi Umwēne ātēndekígwe ukuya mbili, polelo Umwēne alinkugōmokéla ku yilayila Mbānda ya Mōto. Polelo akabalilo kāko Umwene āganége na Pauli pa nsebwe gwake ugwa ku Damaska, Umwēne ali Mbānda ya Mōto yila, lūla u Lumúli, muketile, u Lumuli ulukulumba. Kangi Pauli alinkuti, “Yo ani yo Umwēne une ngufwīma?”

42 Umwene alinkuti, “Une ne Yeso, Uyu ugwe kufwīma,” u Bwēlu. O, ngimba Umwene akaya nswigisye?

43 Kangi apa Umwene alipo, ikilo iki, papapa apa na uswe. Ālyégigwe ipīcha Yāke kulakula kula, i Kindu kilakila, muketile, Mbānda ya Mōto, Bwēlu, itolo mulamula mūmo Umwēne āyīlile, “Yulayula mmanyolo, umusyugu, na bwilanabwila.”

44 Lilino abanyāmbála aba bāli nu mwēne bakābubwēne u Bwēlu bula, lōli Ubwēne bwāli pala itolo lulalula. Ifyakukōnga fyāpéle kilakila.

45 Lilino, ngimba ikyēne kyakubagíla ukuti—ukuti yumo ābagíle ukumbona Kristi mu liyumba ili kangi nayumo uyūngi ukumbona Umwēne? Naloli. Ikyene kyabonike kula.

46 Ikyene kyabonike kangi ikilo kimo akabalilo kāko Peteri āli nnyumba ya baminyololo. Kangi u Bwēlu bula bwālisile mu nyumba ya minyololo, nukumpalamasya Peteri, nukwēnda palapala pa lubafu lwa nsikali gwankati, nsikali gwapanja, ukwēnda palubafu lwa kipata, ikipata ikinywāmu, kangi ikipata kya kāya. Peteri alinkuti, “Une mbagíle ukuti nagogwága injosi.” Lōli umwēne akinkukelengania, lōli u Lumuli lwākīndile; Kristi, u Gwasypwa yula, u Bwelu ubusitakumalika. Pala Umwēne alipo. Lilino, pa nsebwe ugwakusuluka... .

47 Kangi kēta, ikindu ikīngi, linga uswe twābagíle ukuyoba isya iki, itolo kisile mu linogono lyāngu. Lōli abanyāmbála

abamahala aba bākōngesyága u Lutōndwa, injila yosa ukufuma ku India, Kubusōkélo, myēsi, ukwisa ukukinda mfikóga na malangalanga (balinkulania ifyakukētéla; kangi abēne bākūyngága akabalilo ka pakilo ukwisila mu ndōndwa) kangi nayumo ugwasýāmbukúlu pamo aligwesa isyakuti nasiku balubwēnémo u Lutōndwa lūla lōli bēne ba bamanyandōndwa. Ikyēne kyāsūngulígwe ku bēne ukulubona Ulwēne.

⁴⁸ Popāpo ugwe ubagīle ukukēta ifīndu ifi umwīnitu uyūngi akabagīla ukukēta. Kwa ugwe, Ikyēne kyo kwanaloliloli. Ku mwene, abene batikukipilikisya mma. Itolo ngati ulupīndúko; ugwe ubagīle ukupīnduka nukwīkyēla isayo sya Kyāla, itolo—itolu ukunwa mu sayo sya Kyāla. Kangi umwīnitu uyūngi, itūgésye kifuki na ugwe, “Une ndikukēta ni kīndu nakimo.” Muketile? Muketile? Ikyo kyo ikyēne. “Une itolo ndikukipilikisya ikyēne mma. Une ndikukibona iki ikyēne kyo kya fiki.” Ena, umwene atikukibona itolo Ikyene. Ikyo kyo kyosa. Kuko, ugwe uliko.

⁴⁹ Ketesya lilino, Pauli pa nsebo gwake ikusuluka. Kangi nakalinga itolo bo ikyakumbonekela ikikulumba iki kyāboníke ku mwēne...Lilino, umwene akalīkutīle mma...Ikyo kyo kikipela Pauli ukuya nnuu fiyo.

⁵⁰ Lilino, ikimanyisyo kyītu ikilo iki kikaya kisolofu mma. Ikyēne kyo kimanyisyo kyapamwanyamwanya, lōli, o, uswe kukufikaga ku busolofu, ukufuma pa kabalilo. Lōli iki kyo kimanyisyo kyamwanyanya fiyo, lōli ikyēne kikwānda itolo. Kangi iki ikyēne kili, ikyēne kyo kindu kimokyēne, iki kyo kikufyūsya Yeso Kristi. Pauli, ukwānda.

⁵¹ Kangi bo umwēne akāli ukubōmba iki, Pauli āli mfunda i Bāngéli. Kangi u mfunda i Bāngéli atisa kubíkāmo siku ikimanyisyo kyāke pa fyakumbonekela. Umma, nkulumba. Abene batisakubíkamo siku ikimanyisyo kyābo pa fyakubonekela. Ugwe ubagile ukuya nu luko lulilōsa ulwa fyakukubonekela. Loli ikyēne kikufīmbilisígwa ISI SYO IKUTI U NTWA. Kotalusya.

⁵² Lilino, mu Lwitikano Ulukulu, abene bāli ni njila itatu ingindanengindane abene bābagīle ukumanya indumi. Ikyākwānda, ululagilo, lula lwāli itolo lulagilo. Polelo, abene bāli nu—nu nsololi; u gwānjosi; kangi abene bāli na Urimu Tumimu. Lilino ikyo kibagile ukuya kisolofu panini.

⁵³ U Urimu Thumimu yāli sahani yapakipāmbága iyi Aaron āfwālága pa kipāmbága kyāke. Mula syālimo isangalabwe kalongo na sibili: yaspara, saradisi, carabanku, na fyosa bo ifyo, ukukīndilīla ukusuluka. Abēne bāli nasyo syōsa isangalabwe inywāmu, isi syāli mu sahani yapakipāmbága, ukunāngísya ukuti umwēne āli yo mputi nkulumba gwa lūko lōsa lwa bāndu, uluko kalongo na ibili lwa Israeli. Isahani yapakipāmbága iyi yātulikigwāga pa mbānda nkipānga. Kangi

akabalilo kâko u nsololi âsôlwîle, kangî abêne bâlôndaga ukuya basisimikisye icyêne kyâli kitalusye, pammo mma, abasololi pamo abagogwanjosi bîmâga pankyêni pa Urimu Thumimu uyu, kangî umwêne ayobaga injosi yâke pamo imboniboni yâke, kilikyôsa iki umwêne âkibwêne. Kangî linga u Bwelu Ubwikémo. . . O, ngimba umwe mukubona ikylene? Kyala akabalilo kalikosa ikwitugasya mu ndubafu ulukîndakipeligwa. Ulufuluganio, imululi sila, syâli itolo kanunu mpaka ilisyu ili lyâsókile panja. Kangî akabalilo kâko ilisyu lyâtíkile isangalabwe sila, linga icyêne kikâli kikîndakipeligwa, umwêne âyaga kimyemye. Lôli linga icyêne kyâli kikîndakipeligwa, i Mulimuli sila syôsa syândalikâga îlângi sya kipîngafula palikimo. Amenî. Polelo, yula âli Kyala ikuyoba, “Uyo yo nsololi Gwangu.” Pamo, “Injosi yila yâlîsîle ukufuma kwa Une.” Ikyene kyâli kyakufwâna na Urimu Thumimu yula iki abêne bikulônga.

⁵⁴ Kumbukilâga Sauli akabalilo kâko umwêne âgomókile nyuma? Umwêne alinkuyoba umwêne alinkutoligwa ukuya ni njosi. Kangî u nsololi, Samueli, âfwîle, kangî yikâlipo ni njila nayimo. Umwêne alinkuyoba, “Yope na Urimu atisa nukuyoba kwa une.” Nakimo. Sauli âlimîle pankyêni pa Urimu, kangî amasyu gâke gâli kukung’unda ukufwâno. Muketile? Kyâla âlinkânîle itolo umwêne. Kangî u Urimu Thumimu yula, kila kyâli kisisimikisi kya Aroni isya bupûti bwâko. Ukufuma pa kusókâpo kwa Aroni, Môse, i—i sahani yâtulikigwâga pa mbânda.

⁵⁵ Lilino, ubupûti bwa Aroni bwâmalîke akabalilo kâko Yeso âfwêge. Kangî lilino, ukupâgulania ululagîlo ukufuma ku ipyâna, uswe tukâli tuli na Urimu Thumimu. Kangî Pauli âbombelâg’imbombo Ikyêne. Muketile? U Urimu Thumimu umwîsyûgu lyo IyâKyâla, Ilisitakufwa, Lyasyêpwa, i Lisyu ilisitakumalika. Muketile?

⁵⁶ “Kabuno aligwesa uyu isakwegamo ukusôsyâmo kalikôsa ka Bûku uyu, pamo ukôngelêla kalikôsa ku Lyêne.” Une ndikulônda kalikôsa ka Ilyêne, lôli une ngulônda lyôsa ili Ilyêne lilinalyo. Ikyo kyo Kipânga uswe tukulônda. Kangî ifindu fyosa fibagile ukuya fisisimikisigwe ni Lisyu.

⁵⁷ Iyo yo nongwa une nâtoligwémo lululu ulu pakati pa bându aba Kipentekosti, panongwa yakuti, ukuyoba, “Une nâtoligwe ukupilikisya kûko amafuta gikusôka ukufuma mmaboko gînu, pamo ililopa ukufuma nkîsyo kînu, kyaali kimanyilo kya Mbepo Mwikemo.” Ikyo kikaya Kyammasimbo kangî une—une ndinkutoligwa ukukyêga icyêne. Ikyêne kikufîmbilisigwa ukwîsa ukufuma mu Lisyu.

⁵⁸ Kangî lilino, Pauli, umwene âliganîle itolo i Lisyu. Popâpo, bo umwêne âkâli ukubîkîla ubukêti siku ikyakubonekela ikikulumba iki iki umwêne âli nakyo, umwêne âbûkîle ukusuluka mu Igupti ku fyînja fitatu. Une ngwitika icyêne

kyáli fyīnja fitatu, ifyīnja fitatu kula mu Igupti. Kangi umwe mumenye iki une ngwitika umwēne ābombīle? Une ngwitika umwēne ālyēgīle u Lwītīkáno Ulukúlu, nukulōndesya ukukīndamo mu Lwītīkáno Ulukúlu, nukwāga ukuti Yūla naloliloli āli Mesiya gwanaloliloli. Umwēne alinkufimbilisigwa ukusisimikisya ifyakumbonekela fyāke ukwisila mu i Bāngéli. Ameni. O, mwe!

⁵⁹ Keta ku mwene akabalilo kako umwene aali minyololo. Umwe mukukētésya, yilipo i—i fwāsi ya būmi bwa Pauli akabalilo kāko umwēne āli mminyololo kula kukabalilo katali. Umwēne āsīmībile Būku gwa Baefesi. Umwēne āsīmībile u Kalata gwa Bahiburi uyu. Muketile? Umwēne āli na kabalilo. Kyāla ālindongwīsyē umwēne ukunsōsyāpo ukukilania kula mminyololo, kangi umwēne āsīmībile a Bakalata aba ku fipānga. Yumo ku kipānga kya Baefesi. Umwēne āsīmībile yumo ku kipānga kya Kipentekosti, āli ni ndamyō nyingi fiyo na bēne. Ikipānga kya Kipentekosti umwēne āli ni ndāmyō nyingipo ukukīnda aligwēsa uyungi. Kikāli kili nalo. Lōli umwēne āpālisyāga panongwa ya bēne. Ikindu kyene iki umwene ābagīle ukubamanyisya abene. . . Akabalilo kako abene bikwīngīla: yumo āli nu lulimi, yumo āli nu lwīmbo, yumo āli nu kunyegēsya, yumo āli nu kwīpilika. Umwēne akābagīle ukuyoba, ukuyoba ku bēne, “Ubuponesigwe bwasyēpwa.” Umwēne akābagīle ukuyoba bēne, “ukusūngulīgwa-ngāni.” Umwēne akābagīle ukuyoba ku bēne, abēne bāli bāna. Abēne bōsa balinkufimbilisigwa uku—balinkufimbilisigwa ukwīpilika ikindukimo, pamo ukukēta ikindukimo, pamo ukuya ni fyākwīpilika ifyakunyegela, kangi, pamo ikindukimo ukusyūngutīla abēne, ikyakusisimikisya kimo.

⁶⁰ Loli une ngwitika, akabalilo kako umwene ayobaga ku Baefesi, umwene aabagile ukuyoba pa, “Kyalā atusungulile uswe ngani ukuya banabalumiana na banabalindwana, kangi atufwikile uswe ukuya bana mwa Yeso Kristi bo lukaligwa ulwalo lwa kisu.” Keta ikyo. Mwe!

⁶¹ Nketesya umwene ikwisa mula mwa Buku gwa Baroma, na fyosa bo ifyo. Abene bali bakusi. O, abene bayobaga mu ndimi, naloli, kanga bali ni fimanyilo fimo ifya Mbepo Mwikemo pakati pabo. Loli abene bakatundike ifimanyilo, kangi ifyakwinyegesya, kangi ukwikinya ukunini, kangi ukwīpilika ukuhesya.

⁶² Pauli alinkuti, “Umwe—umwe—umwe mukubuka ku lwenge na ikyo. Akabalilo kaako umwe mukulondigwa ukumanyisya, umwe mukāli muli banike kangi mukufimbilisigwa ukunwesigwa ulupyu.”

⁶³ Lilino, ikyo kyo iki une akabalilo kosa ngelile ukulwila ubwite ikipanga iki ukuya, komma ikipambo kya banike. Unko uswe tukule. Ima pa nsebwe. O, mwe! Mwaketa lelo.

64 Popapo, Pauli ikubuka ukusuluka kula, icyëkwánda, ukukëta linga icyäkumbonekela kyáke kyáfwanága ni Bångéli lya Kyála.

65 O, ngimba icyëne kitisakuyaga kinyáfu, umwísyúgu, linga abāndu bābōmbága kila kāngi, linga uswe twātēdekaga icyakutubonekela kyítu ukufwána ni Bångéli lya Kyála? Linga icyëne kitikufwána, kokuti icyakutubonekela kyítu kisobi; icyëne kitikumulika mu Urimu Thumimu. Linga icyëne kikumulika nkati Mula, ameni, manya ugwe ulinakyo Ikyëne. Lōli linga icyëne kitikubōmba, kimo... Une ndikupāsyá kali icyëne kinunu bulebule, mūmo kyanaloliloli icyëne kyabonekága ngati kyāli kitalusye; linga imuli sila sikāmulíke pamwanya pa Urimu Thumimu, icyëne kyāli kisobi.

66 Kangi kali kyakukubonekela kinywāmu bulebule ugwe gwāli nakyo, bwanaloliloli bulebule icyëne kyabonekaga ukuya, kali icyëne kíkwtwālága kyëne bulebule, kali kyāli kyabumanyi bulebule, kyo kyōmbo ikikulumba bulebule ukukaba imyoyo; linga icyëne kitikumulika mu Lisyu, icyëne kisobi. Kutalusya. Ikyëne kikufimbilisigwa ukugolokana ni Lisyu.

67 Lilino, une ngwítika mu. . . palipo pakatikati pa nsebwe. Injila, lilino, utubalilo twīngi. . . Une nālisibíle ukubūka ku kipanga kya Nazarene. U Ntwa abasaye abāndu bala. Abanjila-syaiyolo, abakemesígwe ba kiMethodisti kyo iki abēne bali; kipānga kya Kyála, Nazarene, Pilgrim Holiness, ni fīngi fya fipānga ifinunu ifyaiyolo ifikémo fila. Kangi abēne bālisibíle ukwīmba ulwīmbo:

Une ngwēnda mu nsebwe unywāmu ununu
ugwaiyolo,
Ukubabūla kulikōsa une ngubūka,
Une kinunupo njege gwanjila-syaiyolo u
Nkristi, Ntwa,
Ukukinda kilikyosa une mmenye.

68 Kinunu. Kwakuswígísyá. Kangi polelo abēne bālisibíle ukuyoba isya unsebwe-uniwāmu gwa bwíkémo. Lilino, linga umwe mukubala pa ikyo, abēne bikukyēga ikyo ukufuma mwa Yesaya, untu gwa 35. Lilino, linga umwe mukukētésya, umwēne alinkuti, “Kwisakuyapo unsebwe-uniwāmu, *kangi* injila.”

69 Lilino, *kangi* yo mulungisi. Muketile? Unsebwe-uniwāmu, ugwēne gukālī nsebwe-uniwāmu gwa bwíkémo. “Ugwēne gwisakuyako unsebwe-uniwāmu, *kangi* i njila, kangi iyēne yisakukóléligwága, ‘I njila ya bwíkémo,’ komma unsebwe-uniwāmu gwa bwíkémo. “Injila ya bwíkémo!” Kangi injila ya nsebwe pa pakatikati pa nsebwe. Ugwēne gubūmbígwe bo *ulu* ukuti amísi gisakusukilága amakāndi, ku mbafu syosa ibili, ukukyūnga unsebwe ukuya mwífyúsi. Umwe mutikusulwa, umwe muli ni fitubwi fikwīma pa nsebwe gwīnu, akabalilo kōsa,

linga ugwēne gukayēngigwa kanunu. “I njila” yo pakatikati pa nsebwe.

⁷⁰ Lilino, pa lubafu *ulu*, akabalilo kâko abându bikwisa ukuya bapîndúke, aminogono gâbo gikubîkígwa kanunu pa Kristi. Kangi linga abēne bo itolo bali kanini bafundafunda, kangi batikūmilisya pāsi pa lwîpúto, abēne bisakufikága ukuya batalalifu fiyo, kangi bakafu, kangi bakafukafu, kangi basitakupāsyā. Kangi polelo linga abēne bali itolo panini bakwipilikapilika, linga umwe mutikukētésya, abēne bikwisa itolo ukuya bākukinakina kangi bāndísu, pa lubafu *ulu*, muketile, abēne bikubūka mu syakunyegésya na filifyōsa.

⁷¹ Lilino, lōli, i Kipānga ikyanaloli kyo Nongwainunu iyanaloli yamahala, mulamula pakati pa nsebwe. Ikyēne kitikuya kitalalifu pamo kikafukafu, pamo kikaya kyakukinakina. Ikyēne yo inunu naloli, iyaiyolo, i Nongwainunu indūngúle, ulupilikigwa-mundumbula u lugāno lwa Kyāla, kikubūka ukusuluka mulamula pakati pa nsebwe, ukukōléla ukufuma ku mbafu syosa-sibili. Uko ko kutalusya. Lilino ikyo kyo. . . Kangi mumo ugwe kubuka ku kipanga iki? Palapala ukufuma pa Lisyu, Urimu Thumimu.

⁷² Lilino, Pauli ālōndága ukutwāla i kipānga iki palapala pa nsebwe, popāpo umwēne alinkubūka nukwakufūnda ifyínja fitatu pa Masimbo aga umwēne āmenye. Polelo, Pauli āsimbīle ikiyabo ikinywāmúpo kya Lwītíkano Ulupya ulu. Kyāla ālintwēle umwēne ukubōmba ikyo panongwa yakuti ukwēne kukwisa i ngulilo ya Bāpānja. Matai, Mariko, Luka, na Yohani, i Nongwainunu ina, abēne bāli baYuda. Lōli Pauli āsimbīle bingipo abakalata bala.

⁷³ Lilino kētésya, lilino, uswe tukuyaga pakwanda ukulwēga ulwālo ulu lilino, kūko umwēne aliko, ikusimba Ilyēne, ukufuma mminyololo. Kangi umwēne afumile pakuya nifyakūbonekela fyosa ifi. Lōli, ikyākwānda, ikyakumbonekela iki ikyākwānda kyāsisimikisigwe, kangi uyu yo kalata gwāke gwakwígula ku kyēne. Uyu yo kalata gwāke gwa fungulo. Baroma na Baefesi, na fyosa bo ifyo, fili nu buyo bwābo, loli uyu yo kalata gwa fungulo.

⁷⁴ Lilino, untu gosa gwa 1 *go* gukumfyusya Yeso, nukumpāgúla Umwēne ukufuma kukuya nsololi. Iyo yo fundo yosa lilino. Une ngugelaga ukufika ku kyēne itolo nakalinga mūmo une mbagile lilino, ukuti tungitugasyaga akabalilo katali fiyo. Ifundo yosa *ko* kupāgūlania untu umpya- . . . mpya. . . Untu gwa 1 *go* gukupāgúla Yeso ukufuma ku nsololi aligwēsa, pamo ululaligilo lulilōsa, nukunāngisya Yūyo Yeso ali. Lilino keta, “Kyāla.” Uswe tukwānda itolo, ilisyu, ukwanda, “Kyāla.”

Kyāla, ku tuba- . . . *yūyo* ku *tubalilo*
utukindakindane . . .

Utukukindanekindane kukoti “kubutali kunyuma,” akabalilo kākunyūma.

*...ntubalilo utukindanekindane mu njila
ingindakindane alinkuyoba ku ba tata ukwisila
mbasololi,*

⁷⁵ Lilino, muketile, “Kyala, ntubalilo utukindanekindane, mu njila ingindakindane, Umwene alinkuyoba ku ba tata ukwisila mbasololi.” Iyo yo nongwa Umwēne afīmbilisigwāga ukupa Indumi Yāke, ukwisila mu nsololi Gwake.

⁷⁶ Kyāla ātumāga u nsololi Gwāke bo yu Eliya, Yeremiya, Yesaya. Kangi linga ugwe kwisakukētēya, nasiku mu syāmbukūlu syōsa isya kīsu, ikipānga kitwēlémo siku u nsololi. Lōndēya icyēne mu Lwītikāno Ulukūlu, u Lwītikāno Ulupya, pamo mu lisiku ili, mu lisiku ilyabumalikisyo. Nāngisya une nsololi aligwēsa ākusigwēmo siku nkipānga mu lisiku lwabumalikisyo. Nāngisya une yumoywēne isilēmo siku pala, ukusōka. Kangi nnāngisya une akabalilo kamokéne aka u nsololi, ugwāmbōmbo gwanaloliloli gwa Kyāla, uyu ulubatiko lwa kipānga lwa kisu lukālimfuyīle umwēne.

⁷⁷ Itolo inongona isya icyēne. Yeremiya, Yesaya, bōsa ukusuluka ukwisila mu Lwītikāno Ulukūlu, abēne bākifūyīle icyēne. Yeso āyobīle, “Umwe mukumogesya amapūmba ga basololi nukugapela agēne mēlu, kangi umwe mwababīkīle abēne mula.” Uko ko kotalusya.

⁷⁸ Ikipānga kikukīndilīla ikyo. Kēta Mwīkēmo Patrick. Umwe baKatolika mukummwēga umwēne ukuya gwīnu. Umwēne akaya nKatolika ukukīnda mūmo une njīlīle. Uko ko kotalusya. Lōli mukummwēga umwēne ukuya gwīnu.

⁷⁹ Nkēte Mwīkēmo Francis gwa Assisi. Mupokile umwēne. Umwēne akaya nKatolika nakingipo ukukīnda mūmo une njīlīle.

⁸⁰ Nkēte Joan gwa ku Arc. Umwe mwālimmōkīkye umwēne pa mbānda, ukuya ndosi, panongwa yakuti umwēne ākētāga imboniboni kangi yo gwamwambepo. Ukummōkya umwēne pa mbānda. Kangi unkīkūlu yula ikukūta ukupelelīgwa ikisa, kangi abēne balinkummōkya umwēne pa mbānda. Kifuki ifyinja mia yumo, abēne balinkusyāgānia ukuti umwēne āli nsololi gwakīkīkūlu. Umwēne āli gwāmbōmbo gwa Kyāla. O, twitikisyege, umwe mubōmbīle ulufūndo ulunywāmu: umwe mwāfūkwīle imibili gya bapūti nukusopa igyēne mu lusoko.

⁸¹ “Umwe naloli mukunosya amasyeto ga basololi, nukubabīka abēne nkati mula.” Kotalusya. Nasiku ulubātikāno lwa kipānga lusōsisyēmo siku u nnyāmbāla gwa Kyāla; nasiku kikabōmbigwāmo, kikabōmbigwa umwīsyūgu, kangi kitisakubōmbigwāmo. Ubwiputibuti ububātikīgwe bukayamo siku bubōmbélo bwa Kyāla.

⁸² Ikipanga ikikūlu ukukīnda fyōsa nkīsu ikipāgūke kyo kipānga kya Katolika; Luteri, kyakibili; polelo ikwīsa Zwingli; ukufuma Zwingli, ikwīsa Calvin; Calvin, ukukīndilīla, aba

Anglikani, aba Anglo-Saxon bikwégápo, polelo ikipānga kya Anglikani; kangi Mwalafyāle Henry gwa Lwēle, akabalilo kāko umwēne afūyége, na fyōsa bo ifyo; kangi ukukīndilīla ukusulukila kwa Wesley Methodisti, na ba Nazarene, Pilgrim Holiness; kangi ukukīndilīla ukusulukila ku kyabumalikisyo, yo Pentekosti, fyosa fipāgwīke. Kangi i Bāngéli pabwelu likumanyisya ukuti i kipānga kya Katolika kyo u—u nkīkūlu umfumuke-nububibi, kangi ifipānga ifya Protestanti ni fipāngānio fyābo fyo bāna balindwana bāke, Busetuli 17. Ikyo kyo katikati kotalusya. Polelo abene bali . . .

⁸³ Komma abāndu, lilino. Bulimo ubununu mu fyosa ifipānga fila; abakemesīgwe, abandu abapokīgwe. Lōli Kyāla atikukōlēla abāndu Bāke ukwisila mu kipāngānio. Umwēne ikubakōlēla abēne pabene na bēne. Kyala ikubombela na bandu bēne na bēne, kali ugwe uli gwa Methodisti, Baptisti, Protestanti, kangi Katolika, pamo kilikyōsa iki ugwe uli. Kyāla, bo ulwālo lwa kīsu lukāligwa, ākuménye ugwe, kangi akusūngulīle ngāni ugwe ku Būmi Bwasyēpwa, pamo lumo ugwe gwasūngulīgwe ku butāgīgwe Bwasyēpwa. Komma . . .

⁸⁴ Umwēne akāligānīle ukuti ugwe upyūtīgwe, ugwe ubagīle ukupyūtīgwa. Lōli, Umwēne ukuya nsitampaka, Umwēne āfimbilisīgwāga ukumanya ubumalikisyo ukufuma ku bwāndilo, pamo Umwēne akaya Kyāla. Popāpo Yeso akālisilēmo siku ku kīsu itolo ukuyoba, “Mulimosa, Une nisakukēta linga umundu yumo ikuyaga kisa. . . Linga Une ngubōmbēla nu kufwa, mu njila ingafu, abēne lumo bisakwīnogōna, ‘Mulimosa une. . .’ Ikyēne kisa—ikyēne kisakupepeka indumbula syābo, kangi abēne bisa. . .” Kyāla atikwēndesya imbombo Yāke bo ulo.

⁸⁵ Yeso ālisīle panongwa yimoyēne itolo, ko, kupoka bala bābo Kyāla, bo lukāligwa ulwālo lwa kīsu, āménye babagīle ukupokīgwa. Umwēne āyobīle lulo. Uko ko kotalusya. Popāpo ugwe uli . . . “Ikyēne kikaya umwēne uyu iganile, pamo umwēne uyu ikubopela; ikyēne yo Kyāla uyu ikināngisya ikisa.” Pauli āyobīle ikyo. Unnyāmbāla yulayula apa.

⁸⁶ Umwēne āyobīle, “Iyo yo nongwa Kyāla ābagīle ukuyoba, bo akāli Esau pamo Yākóbo bosa-babili ukupāpīgwa, Umwēne alinkuti, ‘Une nunganīle yumo kangi numbēngīle uyungi yula.’” Bo akāli nayumoywēne undumiana akapāpīgwa, Kyāla āménye ukuti Esau āli gwāsōni, kangi Umwēne āménye ukuti Yākóbo āli u. . . umwēne abuganīle ubwabuke bwakupāpīgwa bwāke. Popāpo Umwēne āménye, bo ikīsu kyākāli kikabūmbigwēmo siku, ukufwana ni kyēne. Lilino, uswe tukuyaga pakusyāgānia mu miniti Yūyo uyu āli uyu āménye ikyēne. Untu ugu gulinakyo ikyēne.

Kyala, . . . ntubalilo *utukindanekindane* mu njila ingindakindane alinkuyoba . . . ku *ba tata ukwisila*

mbasololi,

Mmasiku agabumalikisyo aga ayobile kwa uswe ukwisila mwa Mwanundumiana gwake. . .

Abōmbīle fiki? “Ayōbīle kwa uswe mmasiku gābumalikisyo aga ukwisila mu Mwanundimiana Gwāke.”

⁸⁷ Lilino, ngimba umwe mukwīnogōna bulebule lēlo, ukuti, ngimba ikuyaga fiki u nsololi? Ngimba uswe tubagīle ukuya nu nsololi lēlo ugwa lisiku ili? Naloliloli. Umwene abagile ukuyoba ukwisila mwa uswe? Naloli. Loli umwene kila. . . Abasololi aba lisiku lyaiyolo bāli Mbepo gwa Yeso Kristi.

⁸⁸ Lilino, unko uswe tukigolosye kila, ’nongwa yakuti une ndikwīnogōna ikyēne kikwīngīla kanunu mma. Lilino, iyi yo itolo ngati Sukulu ya Pandungu, popāpo uswe tukulōnda ukufikisya iki pawēlu. Muketile?

⁸⁹ Kētésya. Unko uswe twēge Mbepo gwa Kyala uyu āli mwa Mōse, nubupelelesye u. . . ali nsyūngulu gwa ngāni gwa Yeso Kristi. Bosa abākinaji ba Lwītīkāno Ulukūlu bikubīkīla ngani unsyungulu gwa kipīngīka. Mōse, apāpīgwe mwāna umfwāne, ukufīsīgwa mu kitūndu, ukusōsīgwako ku bapāpi bāke, na fyōsa, kangī āli. . . Umwēne āli mwalafyāle, pamo u—u ndōngōsi, umpa-lulagilo, mwimila-pakati, mpūti. Kilikyōsa iki umwēne abīkīle ngāni unsyūngulu Kristi.

⁹⁰ Nkēta Yosefu, āganīgwe na gwīse, ābēngīgwe na bakundwe bāke, kangī ukūlisīgwa pa kifuki utupatu malongo matatu twa siliva. Ukusopigwa nkibwīna, kifuki mfwano; ukusōsīgwāmo. Mbukubilwe bwāke, umwengabwalwa ikupokigwa, kangī unkekanyama ikutāgīgwa; abahiyi babili pa kipīngīka. Kangī polelo akabalilo kāko umwēne ikusōka pānja, umwēne afyūkīle ukufuma nkibwīna kila, kangī ātūgasīgwe ku kiboko ikilīlo kya Farao, ikikabi ikinywamu ukukīnda. . . i—i kīsu iki kyākomīle fyōsa ifīngi ifya kīsu. Kangī nayumo umundu abagile ukwisa kwa Farao pene papo abene bikwisilaga mwa Yosefu; Yeso itugesye ku kiboko ikilīlo ikya Kyala, kangī nayumo umundu abagile ukwisa kwa Kyala pene papo ikwisila mwa Kristi. Kangī akabalilo kāko Yosefu āsōkīlēpo pa kikota nukunyamukapo pala, abanyāmbāla bābūkāga pankyēni pa umwēne, bikulāta nukupūta ingangabwīte, ukukuba ingangabwīte, bikuyoba, “Inama umwe! Yosefu ikwīsa.”

⁹¹ Kangī akabalilo kako Yeso ikwisa, ingangabwite yisakukūta, kangī ilifūndo lililyosa lisakufugama, kangī ululimi lulilōsa lwisakulapa. Ena, nkulumba. Pala Umwēne ālipo.

⁹² Kangī akabalilo kāko Yosefu āfwīle, umwēne ālekīle ikikumbusyo ku bēne bābo bāgūlilāga ubuponesyo.

⁹³ Une nabīkīle ikiboko kyāngu pa libokosi ilyaiyolo akabalilo katali aka kakīndīlēpo, ilyēne lyātēndekīgwe ukufuma kwa lēdi. Kangī umbili gwāke gwābagīle ukwitūgāsya. . . ififupa fyāke. . .

Alinkuti, “Komma umwe ukunsiyila une kuno, kabuno ilisiku limo, Kyála ikuyaga pakukuyátıla umwe.” Umwene áli nsololi. “Kyála ikwisa ukubayátıla umwe.” Kangi alinkuti, “Akabalilo kako umwe mukubuka ku kisu icyálufíngo, ega ififupa fyāngu.”

⁹⁴ Aligwēsa u Nhiburi ugwaiyolo, ni nyuma yikomígwe kangi yáililopa, ábagíle ukukēta mula mu libokosi lila nukuyoba, “Ilisiku limo, uswe twisakusōka pānja.”

⁹⁵ Yeso álekíle icyakukūmbukíla, ilipūmba ilyābwási. Ilisiku lisiku limo uswe tukubūka kula ku lipūmba, kangi abaganigwa bítu, nukupilika utufu utunini utwaiyolo, akabalilo káko abēne kikuyoba, “Mfwāndilo ku mfwāndilo, kangi umfu ku mfu, kangi ikísu ku kísu.” Lōli, nkundwe, uswe tubagíle ukukēta ukukilania i nyānja, ku lipūmba ilyābwási. Ilisiku limo, uswe tukusōkangápo apa. Uswe tukubūka ku Kāya. Umwēne ikwísa. Kilikyōsa kyálimililígwe.

⁹⁶ Nkēta Davidi, akānīgwe ba bāndu bāke bēne, ukusōsigwápo pa kikota na bāndu bāke bēne. Ukuya mwalafyāle gwa Yerusalemu, álundusígwe ukufuma mu Yerusalemu na bāndu bāke bēne. Kangi bo umwēne ábúkíle pamwanya pa Kyāmba Mafilu, umwēne alinkukēta kunyuma nukukūta. Umwēne ápíkígwe.

⁹⁷ Ifyingi bamia lwēle ukufuma pala, u Mwanundumiana gwa Davidi, Mwalafyāle gwa Yerusalemu, álitūgésye pa kāmba nukukūtuta, ’nongwa yakuti Umwēne ápíkígwe.

⁹⁸ Yula áli Mbepo gwa Kristi mwa Davidi. Fyosa fyāpag’unsyungulu ngāni ikipingika. Abasololi bala ukugomokela kunyuma kula bāyobelága mu Ngamu Yāke. Abene bitugasayaga mu Ngamu Yāke. Abene babombielága mu Ngamu Yake. Naloli. “Kyála ntubalilo utukindanekindane mu njila ingindakindane alinkuyoba ku ba tata ukwisila mbasololi, loli mu lisiku ilyabumalilo ili ukwisila Mmwanundumiana Gwake.”

⁹⁹ Popāpo abasololi na banyāmbála abāmwāmbépo, ilisiku ili, ko itolo kundalika kwa Kristi. Pala, ukwisila mu lulagílo abēne bālimíle, kēta. Ukukilania apa abēne bikwíma, bikukēta nyuma injila iyingi, ukwisila mu lípyāna.

¹⁰⁰ Ikyo mu Bahiburi 11, untu gwabumalisyo, une kingikingi nswigilépo ikyo. Mu ntu gwabumalikisyo, ikiyabo kyābumalikisyo kya untu gwa 11 gwa Bahiburi, akabalilo káko umwēne ikuyoba isya Abraham. U ntu unkulumba gwa lwítiko, kangi pa bumalikisyo, umwene áyobíle, “Abene balinkubēla mu fipapafyang’osi ni fipapafyambene, kangi bātendekígwe ukuya basitakāndu, kangi balinkukēkígwa pakati. Abēne balinkubēla ukusyūngutíla, nabumo ubuyo ubwakubūkáko, bābēngígwe, nukufūyígwa, nukufwímígwa. Panongwa ya bāla, ikísu iki kikaya kyākufíkápo pa bāndu bo bala.”

¹⁰¹ Polelo Pauli ikwīma nukuyoba, “Lōli kisita uswe abēne bakaya bapelelesye.” Kabuno abēne bākētelāga itolo *ku* kipīngika, kangi uswe tukukēta *ukukīndilila* i kipīngika. Uswe tuli nu Mbepo gwa Kristi bo Ikyēne kifumile ukuya mbili gwa mundu nukwitugasya pakati pa uswe. Uswe tukwīsa apa na Mbepo Mwīkēmo, ulu lo lubatikano lununupo kubutali fiyo.

¹⁰² Kangi utubalilo tumo une nguswīga iki i Kikristi kikugūlila umwīsyūgu. Undumbilili ikubūka nkāya kamo abagilile ukuya . . . pamo ikipānga kimo ikipya pamo ukutumigwa kumo ukupya, ikwikōlēla mwēne nsololi, ikwēnda pamwanya pala, ikuti, “Ena, linga abēne bikūmba une ihela inyingi mwakuti. Linga une mbagile ukuya ni ligali ilinunu ukukīnda. Linga abēne bisa. . . Linga umfwālo gwāngu gwisakufyūsīgwa imyesi ntāndātu giligyōsa.”

¹⁰³ Uswe tukufimbilisya ukuya banunu ukukīnda bōsa. Uswe tukufimbilisya ukuya nu twāya utununu ukukīnda. Uswe tukufimbilisya ukuya ni myēnda iminunu ukukīnda. Ngimba uswe twisakubōmba fiki akabalilo kāko uswe tukwīma mu kuyapo kwa banyāmbāla bala bābo bēmbēlāga, mfipapafyāng’osi na mfipapafyāmbene, nabumo nu būyo bwa kulāmbalika imitu gyābo, bikwēmbēla mmatēngele? Kangi umundu yumo abagile ukutūgila uswe kangi uswe twitēndekisye ukukileka ikipānga kangi kisita kubūkāka kāngi mma. Iki i Kikristi kikulōnda umwīsyūgu. Uswe tukulōndīgwa ukuya bakwīkosyasoni twībēne.

O Kyāla, yaga ni kisa kwa uswe.

¹⁰⁴ Mu lisiku lila, Umwene alinkuyoba ukwisila mu basololi, loli ilisiku ili ukwisila mu Mwanundumiana Gwake. Lila lyali lisyu lya nsololi, pala. Ili lyo Lisyu lya Mwanundumiana, umwisyugu. O, yisayigwege i Ngamu ya Ntwa!

¹⁰⁵ Mmasyu agāngi, linga ugwe kukēta ku nsyūngūlu, unsyūngūlu, ugwe ubagile ukusoba. Lōli Iki kyo kipīyigwe, ipiicha yo mbelelesye. Kila kyāli ukwisila mu nsololi; iki kyo ukwisila mwa Mwanundumiana Gwāke. Kila kyāli ukwīsa mu nsyūngūlu; iki kyo ukwīsa mu kyakupamalasigwa. Amenī. Umwe mukupilikisya ikyēne? Lukayapo ulusako ukutāga. Ikyēne kyo kīndu kyakupalamasīgwa, ilisiku ili ukwīsa mwa Mwanundumiana Gwāke. O, syo nnyāfu bule!

. . . *yuyo umwēne abōmbīle ansūngwīle gwakilingo . . .*
(O, mwe!) . . . *gwakilingo gwa findu fyōsa, . . .*

¹⁰⁶ Ngimba kyāli fiki ikyēne? Ulwēne lwāli lulagilano. O, pilikisya. Umwēne āsūngulīgwe, Kristi āli, gwakilingo gwa findu fyōsa. O, u mōhēsi āménye ikyo, ukufuma mu ngunda gwa Edeni, umwe muketile, akabalilo kako u mōhēsi āpilike i Lisyu lila pala ilisiku lila, mu bulongi bwa bandu bala. Alinkuti, “Panongwa yakuti ugwe ufumile ku mfu, ku mfu ugwe kwisakugomokelāga;

kangi u Luyūngu lwa nkikúlu lwisakukuyubula untu gwa liyoka.” U Luyūngu ulufingigwe.

¹⁰⁷ Sétáno kingikingi ākētesyága ku Luyūngu lula. Akabalilo káko Ábélo āpāpīgwe, umwēne alinkuti, “Gwaketa lēlo ugwe, lula lo luyūngu.” Kangi umwēne alinkungoga Ábélo. U mwanundumiana gwāke, Kaini, alinkungoga Ábélo. Kangi nakalinga itolo bo Ábélo āfwīle, umwēne alinkuti, “Une njifūndīle imbeyu.” Umwēne alinkuyikéka iyēne. Umwēne alinkuti, “Une njāgīle iyene.” Lōli, ubufwe bwa Ábélo, ubupāpīgwe bwa Sėti bwāli busyūke kāngi. Kētēsya mūmo abēne bīsilāga ukusuluka.

¹⁰⁸ Ulukīndi lula lwa Sėti, ulwēne lukusuluka pāsi, umwīyūfyē, unnyāmba ungolofu; ukukīndilīla pāsi ukukīnda Enōki; ukukīndilīla kwa Noa, ku bumalikisyo bwa bonangiko bwa mwēlésyo.

¹⁰⁹ Keta ulukīndi lwa Kaini, balinkuya bāndu bakomu, bamanyili, sayansi. Ngimba i Bāngéli litukuyoba. . . Ngimba Yeso akāyobile, ukuti, “Abana ba nkīsu iki bakomupo ukukīnda a Bāna ba Kitangalala”? Kēka ku lubafu lwa Kaini pōpe umwīsyūgu: bakomu, bamanyili, bākwilāmwa, bīpūtīpūtī fiyo; muketile, bīpūtīpūtī fiyo, lōli basayansi, bayēngi, banyāmbála bakulumba.

¹¹⁰ Ega abanyāmbála abakulumba. Nketa u Thomas Edison, bingi abanyāmbála abakulumba. Keta Einstein, imibongo gya kīsu, mūmo-bikuyobela, umwīsyūgu, imibōngo gya kīsu. Lōli uswe tutikugela ukubōmbéla ubōngo. Uswe tukulileka i Linogono lya Kristi liyege mwa uswe, nukukēta ku Lisyu, nukukikōléla ikyēne lūlo.

¹¹¹ Abagānga bāmikota, palema nalinga uswe tukubapālisya abēne na filifyōsa uswe tuli nafyo, lōli bingi ba bāla bo bīlāmwe, basitakumanyakyāla. Kēta abāndu abakomu kangī abamahala. Abēne bali pa lubafu lula kubwa kula, u lubafu lwa Kaini.

¹¹² Lōli keta abiyīsye kangī abōlōlo. Pala po bulipo u busyūke kangī bwāko. O, asayigwege u Ngamu ya Ntwa! Mwaketa lēlo umwe. Ketesya.

...umwēne ālintēndīke umwēne *gwakilingo gwa findu fyosa, mwa umwēne mōpe umwēne ātēndīke ifisu;*

Ywani uyu ātēndīke ikīsu kya pasi? Kristi. “Kristi ātēndīke ikīsu iki?” Ena, nkulumba. Unko uswe tubūke itolo panini pankyēni.

Yūyo ukuya bwēlu bwa lwīmiko bwāke, kangī kifwāne kyakulingāna ikya buyepo bwāke. . .

Ubwēlu bwa lwīmiko lwa Ywāni? Lwīmiko lwa Kyāla. Ikifwāni kyakulingānia kya Buyepo bwa Ywāni? Bwa Kyāla. O, une nkiganile iki!

...pamo ikifwāni kyakulīngānia kya bündu bwāke,
kangi ukukoleléla mmwānya ifindu fyōso fya lisyu. . .

Mwaketa lēlo umwe. I Lisyu, ili likukoleléla mmwanya ifindu fyōsa. Yeso āyobīle, mwa Matai 24, “Mmianya ni kīsu fisakumalika, lōli a Masyu Gāngu gatisakumalikāmo siku.” Umwēne ikukoleléla mmwanya ifindu fyōsa.

¹¹³ Sayansi ikugela ukugwīsyā pāsī Ilyēne, nukuyoba, “Ilyēne lyo i Būku ilyaiyolo. Ilyēne lisanusīgwe.”

¹¹⁴ Kyōpe i kipānga kya Katolika gwa Roma, Bishopu Sheen āyōbīle, “Lila lisanusīgwe kana pamo kahano utubalilo utukindanekindane, kangi fikayako fīngi ku Lyēne mma. Ugwe ukābagīla ukwitūgasya ukwisila mu Lyēne linga ugwa gwafimbilisigwāga ukubōmba.” Loli Umwene ikukolekēla mmwanya ifindu fyōsa ukwisila mu Lisyu Lyāke. Amenī. Ikyo kyo iki une ngwinogona isya Ilyene. Une ngwitika i Bāngéli.

...illsyu lwa maka gāke, (galimo amaka mu Lisyu),
akabalilo kāko alibīkīle mwēne ukusukīgwa imbībi
syītu, . . . (keta apa) . . . itugesye ku kiboko ikililo kya
Lugīndīko ku mwanya;

¹¹⁵ Ngimba Pauli ikugela ukubomba fiki? Umwēne ikugela ukunāngīsyā ukuti Kyāla ābīngilile i fīndu fyōsa mwa Kristi, kangi Kristi āli kifwani kyakulīngania kya Kyāla. Untu gōsa ugu gusyēle gukubōmbēla na mūmo fikuti Umwēne āli pamwanyapo ukukīnda a Bāndūmi, pamwanyapo ukukīnda amaka gōsa. Abāndūmi bammwiputāga Umwēne. Pauli āgelāga ukunkūsyā Umwēne.

¹¹⁶ Lilino, une ngulōnda ukugela. . .Linga une ngutoligwa ukubūka pabutalipo ukukīnda iki, gosa ugu gusyēle gukunkūsyā itolo Kristi. Iki Pauli ikuyoba pa bwa apa, ngati mu ntu gwa 11, kangi fyōsa ifya kuyoba isya kīsu. Umwene alinkuti, “Ngimba u—u Gwandumi yula aabombile fiki, ‘Ugwe gwe Mwanundumiana Gwangu, ilisiku ili Une ngupāpīle Ugwe?’” Muketile?

¹¹⁷ “Kubumalikisyo bwa kisu, abene bisakupyutigwa. Ikīsu kisakupyūtīgwa. Lōli i. . .Kangi ifindu fyōsa ifya kīsa fisakupyūtīgwa. Umwēne ābagīle ukufiniēmba ifyēne bo mwēnda. Ifyēne fikuyaga fyaiyolo, nukusanusīgwa, nukukīnda ukusōkāpo. ‘Lōli Ugwe kusyāla. Ugwe kusyāla bwilanabwila. Ugwe gwe Mwanundumiana Gwāngu. Ilisiku ili Une ngupāpīle Ugwe, kangi utisakupyūtīgwāmo siku, ukwitūgāsyā ku kiboko ikitalusyē kya Lugīndīko.’”

Ngimba *ikiboko ikililo* kokuti fiki? Komma, Kyāla ali ni kiboko ikililo iki yumo ikwītūgāsyāpo pa kyēne. *Ikiboko ikililo* kokuti a “maka na bulagili,” ali nabo ubulagili bwa kilikyōsa m’Mwanya na nkīsu. Kangi i Myānya gyōsa ni kīsu fitēndékīgwe nu Mwēne.

118 Lilino, Ngimba yo Ywána u Miána unkululumba uyu, u Mwinitu unkulumba uyu, Kristi? Apa, Kyála mwa Tāta, Mwanundumiana, kangi Mbepo Mwikemo, icyēne kikaya... Ikyēne bo butatu, lōli Ikyēne bukaya butatu bwa bāndu. Ikyēne bo butatu bwa mbubombelambombo, bwa Kyála yumoywēne ntiga.

119 Umwēne āli Tāta ikulōngosya abāna ba Israeli. Mula mwāli mbubōmbelambombo Bwāke, u nkulumba Yehova Tāta. Kangi Umwēne ālītūgésya pa kīsu, ikukōlélígwa Mwanundumiana. Kangi lilino Umwēne ikwitūgásya mu Kipānga Kyāke, ikukōlélígwa Mbepo Mwikémo. Komma a Bakyala batatu; Kyála yumoywēne ntiga mbubōmbélambombo mutatu: Tāta, Mwanundumiana, kangi Mbepo Mwikémo.

Abāndu bikugela ukutēndéka Umwēne ukuya Bakyála batatu, Kyála Tāta. Iyo yo nongwa, abaYuda, ugwe ukabagilámo siku, ugwe utisakutwalámo siku iki kwa nJuda, umma, kila pala. Umwēne akabagíla. Umwēne alinalo ulukomelesyo, ukuti, “Une ne Kyála Yumoywēne.” Alipo itolo Kyála yumoywēne ntiga.

120 Mu Africa abēne bikōsya injila itatu ingindane: abēne bikōsya kamokēne kwa Tāta, kangi kamokēne kwa Mwanundumiana, kangi kamokene kwa Mbepo Mwikémo. Aba Apostolic Faith mission, abēne bikōsya katatu, kisyo kunkyēne, ku bufwe Bwāke. Iki abēne bikukikōléla Full Gospel ku Kiloboko Kyakubwingililo, pamo ku Kiloboko Kyakubusōkelo, bikōsya katatu kubwakunyuma, bāyobíle Umwēne...ku busyílígwe Bwāke.

Kangi umwene aatile, “Akabalilo kako Umwene afwege, Umwene āgwílile kunkyēni.”

121 Uyungi āyobíle, “Gúlíla. Ugwe kufimbilisígwa ukusyíla u mūndu pa nyuma yāke.” Itolo ifindu fyabumang’anyi ifinini ifyaiyolo, napāpo, abēne bosa-babili basobi; bosa-babili basobi, ukufwana ni Lisimbo.

Iki yo Urimu Thumimu. Ikyene kikumasya icyēne.

122 Lilino, apa, unko uswe itolo tukyēnesya mōsa nukukēta iki—iki icyēne kikubonekéla, ikilo iki. Apa icyēne kilipo, linga umwe mukulōnda ukukibona icyēne. Mu fyosa fya kifuki fyinja malongo-mabili-na-fihano une njile ndumbilili, une nkifundíle ikyo. Kangi une kingikingi nswígíle ku fikūngílwa nkipānga. Ngimba ifikūngílwa fila fyo fiki? Ubusololi, ukuyoba mu ndimi, ukusanusya kwa ndimi, ubusetuli Bwanwakyaala, na fyōsa bo ifyo, ifi fyōsa fikwísíla mwa Kristi.

123 Lilino kēta. Kristi yo Ntu gwa findu fyōsa. Kangi Umwēne yo Ntu gwa Kipānga. Kangi ngimba umwe mukētílémo siku i diamondi ilinywāmu? Ilikulumba ilinywāmu idiamondi ili limotolígwe kanunu, ilyéne lilinato utumotoke utunini tumōtwikéko ukufuma ku lyēne, ukumotokáko ukufuma ku lyēne. Ikyo kikutēndéka i diamondi ilitalusye. Ngimba

akamotoke ka fiki? Ili diamondi ilyānalóli, injila yīyo ilyēne likwísila pánja, ilyēne likubulígwe; ilidiamondi lyanaloli, akabalilo káko ilyēne lyāgígwe.

Une nāli ku Kimberley. Umwe, mwe bingi ba umwe, mwe mupilike umwe mubagíle ukusala ilidiamondi ndukīndi, ikyo kyo kitalusye. Billy na une, na Tata. Bosworth. U presedenti gwa migodi gya diamondi gya ku Kimberley, ikwēga... Umwēne āli ndongola-buyo gwāngu mu lukomano kula. Kangi abēne bātswēgíle uswe kula. Kangi itolo ukufuma mu... Abēne bikufukula agēne pánja, o, kifuki amafiti elifu yumo na bamia bahano na babili pási pa kīsu. Agēne gikusōka pánja, ibwe lya bluu, bluu unywāmu, ngati ili ibwe-lyabluu umwe mukulyāga ukusyūngutila apa. Kangi abenekaya bala, abēne bikubabíka abēne amafiti elifu yumo na bamia bahano na mabili, ukufukula agēne, ukukyūnga untengo uyege mmwanya. Ugwe gwābagíle ukubūka ku kisoko kula, abēne bakifugatíle na basikali ikyēne ku mamailosi bamia. Ega indóbo ibili isya magaloni mabili, umwēne alinkuyoba, nukupimba iyēne yīswíle nu—nu nsānga, kangi linga ugwe gwābagíle ukufika kukāya nu gwēne, ugwe ubagíle ukuya gwamamiliyoni, gisakuyāga ngamo amadiamondi mīngi fiyo mu gwēne. Lōli abēne babagíle ukubōmba nukufukula agēne, ukubíka untēngō pamwanya pa gēne.

¹²⁴ Lilino, i diamondi, akabalilo káko ilyēne likusōka pánja, ilyēne lyo itolo linywāmu, litenenefu, lyakusyungutila, ngati, kipatu kya ndalasi. Lilipo i diamondi ilyabluu, i diamondi ilititu, emeradi, kangi i diamondi ilipelesye, diamondi ilyēlu. Lōli akabalilo káko ilyēne likusōka pánja... Polelo akabalilo káko ilyēne likutēndekígwa nukubíkígwa mububōmbélo, kalipo akayabo ka diamondi lila kakufimbilisígwa ukutāgako. Kangi ilyēne likufimbilisígwa ukutaga i—i ifibulutuke fya ilyēne. Ukubālula utubulutuke utunini, panongwa yakuti, akabalilo káko ilyēne likwísa mu bwēlu ubwakutalula, bo *ulu*, ilyēne likupela ukumulika. Akapatu, aka ko kakupela ukumulikamulika, mūmo akēne katumulilígwe. Akēne katumulígwe, kapātulígwe, kangi polelo, akabalilo káko akēne kakubōmba, akēne kakutēndéka ulumulikamulika. Kangi kamo kikubūka ubwēlu bwambindimbini, akāngi kikubūkāga ubwēlu bwa bluu, kangi lumo akāngi, ubwēlu bwa emeradi, kangi ubwēlu ubukesefu. Kangi utubwēlu utukīndānekīndāne tukubūka ukufuma ku lyēne, ukufwana kipingafula. Abēne bikulikōléle ilyēne, “moto mu diamondi.”

¹²⁵ Lilino, lumo mwa imuli sili lukwīmilíla ifikūngílwa. Lōli ikyēne kyo, kyēne, Kristi yo Diamondi. Kangi Umwēne āli yo Yūmo Yuyo ālisíle, kangi ākuyubulígwe, nukufulasígwa, nu kubulutulígwa, ukuti Umwēne abāgíle ukwīndalíka Mwēne kunyuma ukuya Bwēlu ku kīsu. Umwēne yo Fundi Diamondi.

¹²⁶ Ngimba umwe mubagíle ukwinogonela, bo kukāli nukuya i

kĩsu, bo kukāli ukuyako ubwēlu, bo kukāli ukuyako u lutōndwa, bo kukāli ukuyako kalikōsa? Kwāliko i Nyībúko ingulumba yikusōka, iya Mbepo, kangi ukufuma ku Nyībúko iyi mulinkwisa ulupelelesye ukukĩnda ulwa ulugáno, 'nongwa yakuti kakalipo nakamo ukuti ulwēne lwise ukufuma ku yila lōli ulugáno. Lilino, uswe, iki uswe tukukikōléla lugáno, umwĩsyúgu, lo lugano uluniongasye. Lōli itolo bo uswe tukwāgamo ifyakulōndígwa, pamo akapatu kanini ka lugáno lula mwa uswe, ulwēne lukwāndusya aminogonelo gĩtu gōsa.

127 Polelo ukufuma mu yila kukwisa akasōko akāngi, ukufuma ku Nyībúko inywāmu iyi, i Diamondi, kangi ikyēne kyākōleligwāga bugolofu, bwanaloli ubugolofu. Lilino, iyo yo nongwa uswe twābagile ukuya ne lulagĩlo. Iyo yo nōngwa ululagĩlo lubagile ukuya nu bulongi. Linga nabumo ubulongi bukukōnga ululagĩlo, ululagĩlo lutikubōmba nakanunu nakamo. Kangi akabalilo kāko ubulongi bwātumulígwa nu lulagĩlo, iki kikutwāla ubufwe, kangi akayapo nayumo yuyo ābagile ukuhōmba ulufundo lōli Kyāla Mwēne. Kangi Umwēne āhōmbile ulufundo lwa bufwe bwĩtu, kangi ālyēgile imbibi syĩtu pa Mwēne, ukuti uswe tubagile ukuya bwikemo bwa Kyala ukwisila mwa Umwēne.

128 Lilino, akabalilo kāko aMabwelu amakulumba aga galinkusōka, pamo imulimuli ingulumba isya Mbepo: lugano, lutēngáno, ubo bo bōsa bwāliko, Bula. Kukālilo nakumo ukukubilwa. Kukāliko nalumo—nalumo ulubēngo, pamo nakamo akabini; akēne kakābagile ukufuma mu Nyībúko iyi. Yula ali yo Yehova. Yula ali yo Yehova Kyāla. Kangi lilino, bo mūmo abafundakyāla bikukikōléla ikyēne, u theofani alinkubūka ukufuma Yila, iki kikukōléligwa mu Fyamasímbo, u “Logos,” u Logos uyu ābūkile ukufuma kwa Kyāla. Ikyēne kikafu ukulíngania, lōli Umwēne āli kiyabo kya Kyāla.

129 Lilino, apa kyo iki kyāboníke. O! Nhobokela une. Une—une—une itolo ngufika pa iki, iki itolo kikunyēga une palapala une ngukigana ikyēne. Muketile? U Logos, kangi i Nyībúko ingulumba iyi, i Nyībúko ya Mbepo ingulumba iyi iyi yikāli nu bwāndilo nabumo pamo ubumalikisyo nabumo; u Mbepo unkulumba uyu alinkwānda ukwībumba, kangi u Logos uyu ābūkili panja ukufuma ku Yēne āli yo Mwanundumiana gwa Kyāla. Iyēne yāli yo bubūmbe bwēne ububoneke ubu Mbepo āli nabo. Kangi Iyēne yāli theofani, iki kokuti u mbili, kangi u mbili gwāli ngati nnyāmbāla.

130 Mōse ākibwēne Ikyēne akabalilo kāko Ikyēne kyākilénie ukukĩnda i . . . kifuki—kifuki ilyalábwe. Kangi umwēne ākibwēne Ikyēne, alinkuyyoba, “Ikyēne kyābonekága bo kiyabo kya kunyuma ya mūndu.”

Ugwe go luko lulalula lwa mbili ugu uswe tukwāmbilila akabalilo kāko uswe tukufwa apa. “Linga ikitēmbe ikyamfu

iki kisungulwíke, uswe tulinakyo kimo kitalile kikugúlíla.” Ikyo kyáli Ikyène. Kangi uyo theofani uyu yo áli Mwanundumiana gwa Kyala. Yúla Mwanundumiana, yula Logos, alinkuya mbili, panongwa yakuti uswe twábíkígwe mu mbili. Kangi u theofani, u Logos, alinkuya mbili, apa pakati pítu, kangi Ikyène kikáli nakimo ikingi lóli ubuyo bwákwítugasyámo, kabuno i Nyíbúko yósa yítúgasyága mu Mwene. O, ngimba umwe mukukiketa ikylene? Pala Ikyene kilipo. Ikyo kyáli Yumo, ukuti, mwa . . .

¹³¹ Keta kuno. Unko uswe tusanuke lilino nakalinga itolo ku Bahiburi, untu gwa 7, itolo pa kabalilo ka—ka lípyána, Kyála ukuya mwígáne. Unko uswe tukéte iki ikyéne kikuboneka ngati apa. Abraham!

Ngimba ko kabalilo kalinga aka uswe tulinako? Uswe tulinago amaminiti kalongo. Umma ndaga. Uswe tubagíle ukukóla iki, polelo uswe tukumálsiya ikyéne mósa ilikónge, ilikónge, pamo Pandungu, u Ntwa ikwiganága.

¹³² Abraham ágomokelága ukufuma ku bupyúte bwa mwalafyále.

Kabuno u Melekisedeki uyu, mwalafyále gwa Salemu, . . .

Balinga aba bamenye kúko, yúyo, iki Salemu áli? Yerusalemu.

. . . mwalafyále gwa Salemu, unsóka gwa Kyala ugwapamwanyanya ukukínda, yuyo ályágéne na Abraham ikugomokáko ukufuma ku bupyúte bwa banyafyále, nukunsaya umwène;

Pilikisya.

Kwa yúyo yópe Abraham ikupa ikiyabo kya kalongo kya fyósa; ikyákwanda ukuya mu kusanusya u Mwalafyále gwa bugolofu, . . . ukufuma yula yópe u Mwalafyále gwa Salemu, uyu yo Mwalafyále gwa lutêngáno;

Kisita táta, kisita mama, kisita kikolo, ukuya nabo nabumo ubwándilo bwa masiku, pamo ukumálsiya kwa búi; . . .

¹³³ U Mwalafyále isile pási ukufuma ku Salemu, nukwágána na Abraham ikufuma ku bupyúte bwa banyafyále. Kangi u Mwalafyále uyu akáli nayo nayumo ugwíse, akáli nayo u máma nayumo, akáli nabo ubwándilo bwa masiku, pamo ubumalikisyo bwa masiku. Ngimba yo ywáni uyu Abraham ályágéne nayo? Lilino inogona. Umwène akáli nayo ugwíse nayumo. Umwène akáli nayo u máma nayumo. Umwène akálímo siku na kabalilo aka Umwène ályándíle, kangi Umwène akálímo siku na kabalilo aka Umwène isakumalikága, mwakuti yulayula u Mwalafyále gwa Salemu abagile ukuya ali nu bumi umwísyúgu. Ameni. Umwe mukukibona ikyéne? Ikyène

kyāli yula theofani yula āli yula Mwanundumiana gwa Kyāla. Salemu nki? Yula u Yerusalemu uyu ali Mmwanya, yula Abraham, ukuya āsayígwe, ālōndesyága, ukukāga, ukugela ukukāga a Kāya kāko u Njengi nu Nténdeki āli Kyāla. Umwene alinkubēla mfipapafyang'osi na mfipapafyambene, kulikosa, ndōndo, ukubēla, kangi ālōndesyága a Kāya kāko u Njengi nu Nténdeki āli Kyāla. Kangi umwēne ālyāgéne nu Mwalafyāle gwa Salemu yula, ikusuluka pāsi, kangi umwēne ālinhōmbile Umwēne ikyakalongo kya fyōsa ifikabígwe ku bwíte. Ameni. Uyo yo Mwene. O, Nkundwe Graham, yula āli Mwēne. Yula āli yo Mwene.

Abraham ālimbwéne Umwēne kangi. Ilisiku limo umwene ālitūgésye nkihema mula. Umwene alinkukēta, ukwisa pala, kangi umwene alinkubabona abanyambala batatu bikwisa.

¹³⁴ Umwe mumenye, kalipo akandukamo itolo ka Unkristi, ukuti umwene ikumanya Mbepo akabalilo kako umwene ikuketa Ikyēne. Akabalilo kāko umwēne. . .Umwēne itolo ikumanya ikyēne. Kilipo itolo ikindukimo Kyamwambepo ukufwana ni kyēne. Ifindu Fyamwambepo fikuketeligwa-ngāni Mwambepo. Umwe mumenye. Ena, umwene abagile itolo ukukimanya ikyene, linga umwene yo naloliloli apapigwe. “Ing’osi Syangu simenye a Masyu Gangu.”

¹³⁵ Kangi umwene itolo āménye ukuti ikindukimo kyālipo. Umwene alinkubopa panja, kangi umwene alinkuti, “Isaga nkati, Ntwa gwāngu. Itūgasya pasi. Ima panini. Une ngwegaga ikimomosela kya nkati nukubika nkiboko Kyāko. Une nisakusukāga amalundi Gāko. Itūsya Gwimwēne, polelo kindililāga pa njila Yāko, kabuno Ugwe—Ugwe gwīsile ukunjātīla une.” Mmwānya nkisu ikisitamboto, ukwēga injila ingafu, injila na bapikígwe banāndi ba Ntwa.

Akabalilo kāko, Loti itūgasyága mbukabi, umwīpwa pāsi pala, lōli umwēne itūgasyága mbutulwanongwa. Ikyo kyo iki ubukabi bwīngi bukutwāla bo butulwanongwa.

¹³⁶ Popāpo Abraham alinkubatwāla Abēne pala, bo umwēne ikwēga utwīsi utunini nu kōsya amalundi Gābo. Umwēne alinkubopela pānja mu ngwāta, nu kwakwēga i ngwāta indupano nu ntimo, nu kuyigoga iyēne; ukupa iyēne ku gwambombo, ukutēndekésya. Kangi alinkuti, “Sarah, kanya ubufu bwāko.”

Umwe mumenye iki ukukanya, ikyēne kili, kikusanusya. Umwe mumenye, māma ālisibile ukuya ni kyaiyolo, uluko lwa ngati katapwa, umwēne āli nako nkati mu—u bufu nkitundu. Ngimba umwe mukibwémo siku ikyēne mu sēfa? Kangi ugwe gwāli na katapwa nkati mula, ugwe gwagūsāga ubufu bula, umwe mumenye; nukufika ubusito bo *ulu*, nu kugūsa ikyēne mōsa, ngati. Une numbwēne māma ikubōmba ikyēne, utubalilo twīngi, akatapwa, ukuya na kandu akanini akasyungutīle

aka kali ni sefa ya tusāmbō innini pa kēne. Umwēne egaga ubufu bula pala nukusēfa ubwēne bo *ulo*, umwe mumenye, ukukung'unda kunyuma na nkyēni, bo *ulo*. Polelo kwēga akatapwa nu kugūsa akēne ukusyūngutīla, bo *ulo*, ukubutwāla ubwēne pāsi. Kangi ako ko kabalilo kāko uswe tukubūkāga pāsi nu kwēga ubufu busīgwe ku kigayo kya filōmbe ikyaiyolo; kangi isīnde inywāmu isyaiyolo, umwe mumenye, syāpelāga unkati gwanaloliloli gwa filombe. Ugwe gwabagīle ukukekela ifisinga ilisiku lyōsa pa yēne.

¹³⁷ Polelo lēlo, alinkuti, “Kanya ubufu ubunini, itolo nakalinga. Kangi tēndēka utusyesye tumo papapa apa pa mafiga, papapa nakalinga.” Kangi abēne balinkukāma ing'ombe nu kwagako ulupyu lumo. Kangi abēne balinkulwēga, ukulufuluga ulwēne, nukwagāko ulukēta lumo. Kangi polelo abēne balinkubūka nu kwakugoga ingwāta nu kwakwēgako inyama yimo, kangi abēne balinkukalanga inyama. Balinkwēga ulupyu ululufu, unkati gwafilōmbe, kangi abēne balinkwēga uluketa lumo ukubīka pa kisyesye ikipyāno. O, ikyo kyo naloliloli kinunu. Kangi abēne batyēkāga ulwēne lōsa pamwanya pala. Kangi umwēne alinkukyēga ikyēne pānja, kangi ukukibīka ikyēne pāsi ku Banyāmbala batatu aba.

¹³⁸ Kangi bo Abene bālyāga, Abene balinkūmilīsyā ukuketesya kubwa ku Sodomu. Kangi ukukīndapo akabalilo, Abēne balinkusumuka kangi balinkwānda ukusōkāpo. Kangi Umwene alinkuti, “Abraham. . .” Alinkuti, “Ugwe utisakufisāga ikyene ukufuma kwa une.”

¹³⁹ “Une ngabagīla ukukifisa ukufuma kwa ugwe iki une nguya pakubōmba. Une ngubūka ukusuluka kula. Imbībi sya Sodomu sīsīle mu mbulukutu Yāngu.”

Ngimba āli ywāni u Nyāmbāla? Ulufūmbi mmyēnda Gyāke mōsa, nu kwitūgasya pala ikulya unnyofu gwa ngwāta yimo, nukunwa ulupyu lwa ng'ombe, nukulya ikisyesye kya nkati gwa filōmbe, kangi uluketa lumo. Yo ywāne u Mwinitu uyu unhesya? Babilī, pamo batatu ba Abene, bitūgésye pala. Ulufumbi mōsa mu myēnda Gyāke. O, ena, “Uswe tufumile ku Kisu kyākubutāli.” Ena, kubutali fiyo. Kangi popāpo Umwene alinkuyoba. . . Ena, bāli Bāni gimba Abēne?

¹⁴⁰ Umwene alinkuti, “Une ngabagila ukufisa kwa Abraham, ukuketa ukuti umwene yo gwakilingo gwa kisu kyapasi.” Amenī. “Une ngusetula isyakubutītu Syāngu,” mmasyu agāngi, “ku bala bābo bo bākilingo ba kīsu kyapāsi.” Ikyo kyo kuko i Kipanga kikulōndīgwa ukuya umwisyugu. Uko ko kutalusya. Ukukaba i Fyakubutītu fya Kyāla, ukumanya akīkolélo gwīmwenē, nu kubōmba, na ikyākubōmba, na kēndelo, na kītūgasyīlo. Uswe twe bakilingo ba kīsu kya pasi. Kutalusya. Umwene ikusetula Ikyene kwa ugwe, panongwa yakuti Umwene atisakufisa nakimo

kunyuma. Iyo yo nongwa uswe tukukētésya ifindu ifi fikwīsa ukubonekako.

Ikīsu kikyoyoba, “Aa, ikyo kyo kipāmba kya būmilīsi.” Baleke abene bayobege ikyene. U gwakilingo gwa kisu kyapasi amenye ifindu ifi. [Ubuyo busitakandu pa tepi—Nsimbi]

... kabuno abene bisakukoleligwaga bāna ba Kyala.

Basayigwa abēne aba bo bōlōlo: kabuno abene bisakwīngilapo pa kisu.

Umwēne ikutēndéka isyakubutītu Syāke simanyigwége ku bēne, ikusetula isyēne ku bēne, ukubanāngisya abēne ikyakubōmba na kītūgasyīlo, ukupīka ifindu ifya kīsu kya pāsī; ukwēnda mbunyakyāla nukwītūgāsya mbunyakyāla, nkīsu ikyāmwīsyūgu iki, ukwēnda mulamula nu Mwēne. Kileka ikisu kiyobege iki abene bikulonda ukyoyoba.

¹⁴¹ Polelo Umwene alinkuti, “Une ngabagila ukufisa ikyakubutītu iki kwa Abraham, panongwa yakuti, ukukēta umwēne yo gwakilingo gwa kisu kyapasi. Loli,” Umwene alinkuti, “Une ngusuluka pāsī ukwakubongotola Sodomu. Une ngusuluka.”

¹⁴² “Ngimba ugwe kubombaga fiki, Nkulumba? Ngimba kufumila kūgu? Ngimba ikyēne kyo kyafiki?”

¹⁴³ Isaga ukusyagania, Umwene āyobīle, “Kangi ikindu ikingi, Abrahamu, ugwe ugūlīle ifyinja malongo-mabili-na-fihano pa lufīngo ulu Une ngupēle ugwe. Ugwe ubōmbīle ukētēsīsyē mōsa, i—i nyapini na filifyōsa, panongwa ya mwāna uyu, ifyīnja malongo-mabili-na-fihano ifi fikīndīlēpo. Ugwe ukālī kugūlīla pa Une. Lilino Une ngwisakukuyātīla ugwe, itolo kifuki akabalilo ka būmi, ukufwāna, kabalilo ka būmi, umwēsī ugu gukwīsa Une nisakuyaga na ugwe.”

¹⁴⁴ Kangi Sarah, kunyuma mu kihema. Kangi u Nnyāmbāla uyu inyuma Yake yisanukīle ku kihema, ikuyoba kwa Abraham, bo ulu. Kangi Sarah alinkubūka, “Ha!”

¹⁴⁵ Umwēne alinkuti, “Ngimba fyo fiki fintēndīke Sarah ukuseka?” Ho-ho-ho! Ngimba bule isya ikyo? Kila kyālī kukwābila-patali kumo, bule ikyēne? “Ngimba kyo fiki kintēndīke Sarah ukuseka?”

Sarah alinkuti, “Umma. Une ngasekāmo siku.”

¹⁴⁶ Alinkuti, “O, ena, ugwe ubōmbīle.” Umwēne ātīlāga. Umwēne ātetemāga. Yula āli Ywāni, ābagīle ukumanya iki umwēne ābōmbāga kunyuma ku kihēmba? Yula yo Yula yulayula Kyāla uyu yo ali na uswe umwīsyūgu. Yulayula Yula. Umwēne ikumanya fyōsa ifya ikyēne. Muketile? Umwēne ikusetula itolo ikyēne mūmo ugwe ufūmbilwe. Muketile?

¹⁴⁷ “Ngimba fiki ifi ugwe kuseka?” Muketile, inyuma Yake yīsīndēme ku kyēne. Ili Bāngēli lyāyobīle ikyo, ukuti, “Inyuma

Yāke yāsindème ku kihēma.” Loli, Umwene amenye icyene. “Ngimba umwene fiki, kunyuma kula, ikubōmba *iki*?” Umwe muketile? Polelo, Umwēne alinkuti, “Une ngwisa ukukuyatila ugwe.”

¹⁴⁸ Yo ywāni u Mwinitu unhesya uyu? Umwe mumenye iki kyābonike? Umwēne alinkwēnda itolo panja pala nukuyōnga. Kangi i Bāngéli lyāyobīle ukuti Yula āli Kyāla Mwenemaka, Yehova, yila ingulumba i Nyībúko, yula u Theofani, yula Logos.

¹⁴⁹ Undumbilili yumo āyobile kwa une, akabalilo kamo aka kakindilepo, alinkuti, “Nkundwe Branham, ugwe ukabila ukwinogona ukuti yula āli Kyāla, bule ugwe?”

¹⁵⁰ Une ndinkuti, “Ili Bāngeli lyo liyobile Ikyo kyāli Kyāla, Elohim.” Iki, Umwēne āli Kyāla Mwenemaka, u El Shaddai, uko ko kutalusya, u Mpa-Maka, u Mwikutisi. Amen.

¹⁵¹ O, une ngwipilika ubwiputiputi! Inogona isya icyene. Apa alipo, Umwene ali. Lilino une nguyaga pakubanāngīsyā umwe Umwēne yo Ywāni ali apa, polelo umwe mwisakumbonāga yo Ywāni u Mwanundumiana. Yula āli Yeso, bo Umwene akāli ukuya ni Ngamu ya būndu, “Yeso.”

¹⁵² Ālīmīle pala pa nyībúko ilisiku lila. Kangi abēne bōsa banwāga, umwe mumenye, kangi, “Ukuya na mīsi gāli mu lulangalanga,” ni fīndu bo ifyo. Umwene alinkuti. . . Abene bālyāga a manna ni fīndu. Abene balinkuti, “Aba tāta bītu bālile a manna ndulanga, ku fyinja malongo mana.”

¹⁵³ Umwene alinkuti, “Kangi abene, aligwēsa, bafwile.” Alinkuti, “Une ne Nkati gwa Būmi ugu gukufuma kwa Kyala, ukufuma ku Mwanya. Umwēne uyu ikulya u Nkati ugu atisakufwāmo siku.”

¹⁵⁴ Balinkuti, “Mulimosa, aba tāta bītu bānwīle ukufuma kwa Mbepo, ukufuma ku i Lyalabwe lyamwambepo ili lyāli ndulangalanga, ili lyabakōngāga abēne.”

¹⁵⁵ Umwene alinkuti, “Une ne Lyalabwe lila.” Lwimiko! Yohani Mwikemo, untu gwa 6.

“Fiki,” abene balinkuti, “fiki?”

“Ena. Uko ko kutalusya.”

¹⁵⁶ “Nongwa ya fiki,” umwēne alinkuyoba, “Ugwe guli. . . Ugwe ukaya ni fīnja malongo mahano mbukusi.” Ena, imbombo Yāke yālimpelīle Umwēne ukuboneka nkāngalēpo panini, lōli Umwēne āli itolo malongo matatu. Alinkuti, “Ugwe gwe nnyāmbala ukakīnda ni fīnja malongo mahano mbukusi, kangi ugwe kuyoba ukuti ugwe umbwene Abraham, uyu afwīle ku fīnja bamia lwēle pamo lwēle ya yumo? Uswe tumenye lilino ukuti ugwe gwe mōhési.”

¹⁵⁷ Umwene alinkuti, “Bo Abrahamu akāli ukuya, UNE YONE.” Pala Umwene ali. Ngimba ali yo ywāni UNE YONE? I Ngamu

yakukĩndilila ya ku ngulilo syōsa. Yula āli yo . . . Mbanda ya Moto yila nkati mu lusingi ulwakamoto, “UNE YONE UYU UNE YONE.” Pala Umwēne ālipo, yula u Theofani Umwēne ātēndike apa, kikukōlégwa Mwanundumiana gwa Kyāla, u UNE YONE, u Yehova.

¹⁵⁸ Tomasi āyobīle, “Ntwa, tunānagīsyā uswe u Tāta kangī ikyēne kisakutwīkutisyāga uswe.”

¹⁵⁹ Alinkuti, “Une ndi na ugwe akabalilo katali fiyo, ugwe ukampanya Une?” Alinkuti, “Akabalilo kako ugwe kumbona Une, ugwe umbwēne u Tata. Fiki ikuyoba, “Tunāngīsyā uswe, Ugwe, u Tata”? Une na Tata tuli Yumo. Tata Gwangu ikwitūgāsya mwa Une. Une ne itolo kitēmbē kikukōlégwa Mwanundumiana. U Tāta ikwitūgāsya mwa Une. Ngaya yo Une uyu ikubomba imbombo isi, ikyēne yo Tāta Gwāngu uyu ikwitūgāsya mwa Une. Umwene yo ikubombo imbombo, komma Une.”

¹⁶⁰ Lilino, ukwīma kunyuma kula, kangī, Mōse alimbwēne Umwēne, ikiyabo kya kunyuma ikya Umwēne, alinkuti, “Kyābonīke ngati kunyuma ya nnyāmbāla,” u Logos uyu ābūkīle ukufuma kwa Kyāla.

¹⁶¹ Polelo kyo fiki kyābonīke? Uyu āli Kyāla. Kangī inongwa Umwēne āyīle ukufuma ku Logos ukubūka ku mbili . . . Iki . . . ? Ngimba ugwe bulebule . . . ? Ngimba fiki kyābonīke ku ikyo? Amaminiti mahano bo kikāli ikyo, Umwēne āli . . . Umwēne āli yo Logos. Lōli ngimba abōmbīle fiki Umwēne? Umwēne āfikīle itolo kula . . .

¹⁶² Lilino, imibili gyītu gibūmbīgwe ukufuma ku tumbakasya kalongo na ntāndātu ifya kīsu. Uswe tumenye ikyo. Ugwēne gubūmbīgwe ukufuma ku potashi, kangī—kangī i—kangī u kalisiumu unnini, kangī—kangī u petulolo, kangī ubwēlu bwa mmwanya, na ma atomu, na fyosa bo ifyo. Fyōsa ukubunganisīgwa palikimo, kangī kikutēndēka umbili ugu, kikufuma ku lufūmbi lwa kīsu. Ugwe kulya ifyākulya. Bo ugwe kulya ifyākulya, ikyo kikwānduka ukubūka mu . . . ukufuma ku lufūmbi kangī ikyēne kikufuma ku lufūmbi, kangī ikyēne itolo— itolo kikukĩndilīla mulamula nkyēni. Umbili gwāko, na mūmo umbili gwāko guyīlīle, gukakĩndanapo nu gwa falasi, pamo ukufuma i ng’ombe, pamo kalikōsa akāngi. Ikyēne kikāli itolo mbili.

¹⁶³ Kangī, ndumiana, ugwe kumogesya u mbili; lōli umbepo yula ali nu mōyo nkati mula, nkundwe gwāngu. Uko ko kutalusya. Lōli umbili gwāko go itolo mfū gwa kīsu, ngati kinyamana. Umbili gwāko go gukaya gwakukĩnda ikinyamana. Kangī linga ugwe kunyonywa pa mbili ni kīndu ugwe kukikēta, kunyonywa abakīkūlu, kunyonywa ifindu fyōsa ifi ifikĩndānekĩndāne, ikyene pōpe kyo kinyamana. Uko ko kutalusya. Uko ko kutalusya. Ugwe ulingabōmbāga ikyene. U Mbepo gwa Kyāla

isakukulongolelága ugwe nkyēni nukukubika ugwe pa buyo ubwapamwanyapo ukukinda ikyo. Uko ko katikati kotalusya.

¹⁶⁴ Lilino, kangi apa, uyu unkulumba u Theofani imile pala. Iki . . . Yula unkulumba Yehova Kyāla, ngimba umwe mumenye iki Umwēne āyobīle? Umwēne alinkufikila itolo kula nukwēga ulukufi lwa ma atomu, alinkwēga ubwēlu ubunini, nukōnelēla ubwēne mula, bo *ulu*, alinkubūka, “Whuu,” u mbili, kangi itolo alinkwitogámo mulamula mu gwēne. Ikyo kyo kyōsa.

¹⁶⁵ Alinkuti, “Isaga apa, Gabrieli,” yula u Gwāndúmi unkulumba. Alinkubūka, “Whuu.” “Itoga mu *ugo*.”

¹⁶⁶ “Ugweisa apa, Mikaelo,” u Gwāndúmi ku kiboko Kyāke ikililo. “Whuu.” Panongwa ya . . . “Ugwe itoga mu *ugo*.”

¹⁶⁷ Kyala, na Bāndúmi babili, apa mu mbili gwa bundu, kangi nukunwa ulupyu ukufuma ku ng’ombe ingolōmbe, ukulya uluketa ukufuma ku lupyu, nukulya unkatu gumo gwa filōmbe, nukulya inyama ya ngwāta. Babili a Bāndúmi na Kyāla. Ili Bāngéli lyāyobīle lūlo. Uyo yo Melekisedeki, uyu Abraham ālyāgēne, ikufuma ku bugoge bwa banyafyāle. Uyo yo Mwanundumiana gwa Kyāla.

¹⁶⁸ Kindililága, apa mu Bahiburi, ugwa 7, alinkuti, “Lōli abūmbígwe ndubātiko lwa ngati ku Mwanundumiana gwa Kyāla.” Pala Umwēne ali. Umwēne āpelile ifindu fyōsa mu Mwēne. Kangi Umwēne ālyēndīle palapala pānja pala, kangi itolo alinkwāndusya ulufūmbi lula itolo ukugomokela ku mfu kāngi, kangu ukwitogēla palapala ukugomokela ku Lwīmiko.

¹⁶⁹ Kangi a Bāndúmi, nakalinga itolo bo bampokile Loti na Nka. Loti, kangi umwēne alinkūmilīsyā ukukēta kunyuma. Umwene alinkuti, alinkubabula abene komma ikubōmba ikylene kangi. Kangi Abene balinkwitoga palapala ukugomokela nkati mu—mu Kuyapo kwa Kyala.

¹⁷⁰ Lilino, lo lusūbilo ulukulumba luki uswe tuli nalo mu Lwītiko ulukulumba ulu lūlo uswe tukubōmbela ikilo iki! U Kyāla gwābūmi, u Yehova, i Mbanda ya Mōto, ali na uswe. Ikwināngīsyā Mwēne mu maka, kangi mukubōmbabōmba, kangi ukukusya . . . Ukubītīkīsyā abēne ukwēga i Pīcha ya Umwēne, u Yehova yulayula. U Mwanundumiana gwa Kyala uyu ālisile ukufuma kwa Kyāla, āgomokile kya Kyāla, kangi ukwitūgāsya mu Kipanga Kyake kwa bwilanabwila. Pala Umwene ali.

¹⁷¹ Umwēne ali ni ngamu syītu pa Būku Gwāke, nu lwītikano ululapígwe nu Mwēne, kabuno akayako nayumo unkulumbapo Umwēne abagīle ukulapilapo, ukuti Umwene isakusyūsyāga uswe mmwanya mu lisiku lyabumalikisyo. “Umwēne uyu ikulya u Mbili Gwāngu, kangi ikonwa i Lilopa Lyāngu, ali nabo u Bumi ubusitakumalika, kangi Une nisakusyūsyāga umwēne mmwanya ku lisiku lwabumalikisyo. Umwēne uyu ikwīsa kwa Une, Une mu njila nayīmo ndisakuntāgāmo pānja. Umwene uyu ikupilika i Lisyu Lyāngu, kangi nukummwitika Umwene uyu ālindūmile

Une, ali nu Bumi ubusitakumalika, kangi atisakwisamo mu bulongi siku, loli akilenie ukufuma ku bufwe ukubuka ku Bumi.”

¹⁷² Yula yulayula Yūyo ābagile itolo ukufikila nu kamata ulukufi lwa kalasiumu na potashi, ikubūka, “Whuu,” kangi pala ugwe uli kāngi. Kangi ingamu yāngu yili pa Būku Gwāke. Ho-ho! Ho-ho-ho-ho! Ngimba une ngupāsyā fiku mūmo ifibega fyāngu fikufika pakuniōngāla, mūmo une ngukāngalīla? Naloliloli umma. Na kayabo ka lupasyo mma.

¹⁷³ Nkundwe Mike, limo mwa masiku aga, sayaga indumbula yāko, nkundwe, akabalilo kāko ingangabwite ingulumba yila yisakwisa, akōgo kala, kangi u Yosefu yula isakusōkelāga panja. Haleluya! Umwēne isakuyobāga, “Bāna!” “Whuu.” Pala pisakuya, tupēlīgwe mbufwāne Bwāke; bakeke kwabwilanabwila, ubukāngāle bukīndile; ububine, indamyi, i sulumanie siyōngile. Lwīmiko luyege kwa Kyāla gwābūmi!

¹⁷⁴ Uyu yo Yuyo uyu ikuyobelamo, umwisyugu, Mwanundumiana Gwake. “Mu tubalilo u Tukindanekindane mu njila ingindakindane Umwene āyobīle ukwisila munsololi, loli mu lisiku ilyabumalikisyo ili ukwisila Mmwanundumiana Gwake, Kristi Yeso.” Umwēne ikuyoba ku ndumbula ya mūndu aligwēsa uyu Umwēne akōlīle. Linga ugwe gwipilikēmo siku a Masyu Gāke pamo umpilike Umwēne ikukung’usya ku ndumbula yāko, ngulāmba komma ukusyūmbutuka ukusōkapo pa Kyēne.

Unko uswe twīpūte.

¹⁷⁵ Tāta Gwakumwanya, ikilo iki, pakuti uswe tusangalwīke fiyo ukumanya, ku bwīgūlilo bwa Kalata gwa Bahiburi uyu, mūmo Pauli ābūkīle ukugomokela itolo mu Nongwainunu sila. Umwēne itolo akābagile ukwēga ikyēne pa syakupilika-kubāndu pamo pa kyakumbonekela. Umwene alondaga uswe ukumanya iki kyāli Bwanaloli. Kangi umwēne ābūkīle kulakula kunyuma mu Nongwainunu sila, kangi umwēne . . . ukugomokela mu Lwītikāno Ulukūlu, i Nongwainunu iyi yālūmbilīlīgwe ku bēne. Kangi umwēne alinkukēta, ukukīndāmo mu Lwītikāno Ulukūlu kula, imisyūngūlu gyōsa ni fyākwīmīlila. Iyo yo nongwa uswe tuli nalyo i Buku ilikulumba ili ilya Bahiburi ikilo iki. Kangi uswe tukuketa Ikyene, Ntwa, kangi uswe tuliganile Ilyene. Kangi ukukīnda mu ngulilo, Ilyēne lyōkīgwe, Ilyēne libalanisīgwe, Ilyēne ligeligwe ukusōsigwāpo, loli Umwene ikwēlēla nkyēni itolo lulalula. Kabuno Ugwe uyobile, “Kumwanya na pasi fisakumalikaga, loli a Masyu Gangu gatisakumalika umma.”

¹⁷⁶ Polelo abīlamwe bābagile ukuyoba, “Mulimosa, ugwe utile, ‘Pauli āsīmīle iki.’” Komma Pauli, lōli Kyāla uyu āli mwa Pauli; yula Kīndu ikipelafindu iki kyāli nkati mwa Pauli.

¹⁷⁷ Mumo itolo āli mwa Davidi, akabalilo kako umwene āyobīle, “Une ndisakwitikisya Umwikemo Gwangu Ntiga akētēge

ububole, kangi ndisakundeka umoyo Gwake mu gehena.” Kangi u Mwanundumiana gwa Kyāla egile a Masyu gala ukufuma ku nsololi, kangi alinkubūka kulakula nkati mfipāmbaga fya gehena. Kangi alinkuti, “Bongotola pāsi ikitēmbē iki pāsi, kangi Une nisakukisyusya Ikyēne mmwanya mmasiku matatu.” Kangi Umwēne ābōmbīle ikyēne, panongwa yakuti i Lisyu lya Kyāla likabagīla ukutoligwa; na kapatu nakmokene kakabagīla ukutoligwa. Mumo uswe tukupalisya Kyala panongwa ya iki, uyu unkulumba Urimu Thumimu, kangi ukumanya ukuti ifyakutubonekela fyītu, Ntwa, fikumulika papapa pa i Bāngéli apa! Uswe tupāpīgwe kangi, tuli na Mbepo Mwīkēmo.

178 Gwempala Kyāla, linga alipo unnyāmbāla pamo unkīkūlu nkati muno ikilo iki, ndumiana pamo ndīndwāna, yūyo akabīkilamo siku ubukēti iki, ngimba abene babagile bulebule ukusyuka mmwanya linga bukayamo u Būmi mula? O, abene bikuyoba, “Une ndinabo u Būmi.”

179 Lōli i Bāngéli lyāyobīle, “Umwēne yūyo ikwitūgāsya mu mbusangalufu yo afwīle bo umwēne ali mūmi. Ugwe kuyoba ugwe uli nu Būmi, lōli ugwe ufwīle. Ugwe kwīyobēla,” lyāyobīle i Bāngeli, “ukuti ugwe uli nu Būmi, lōli ugwe ufwīle. Ugwe kuyoba ugwe uli nkābi kangi ukuya nu kufūmbwa kwa nakimo; lōli ukamanya mma ukuti ugwe gwēmpelakisa, kangi ndōndo, kangi gwāngelebune, kangi mfwamaso, kangi utikumanya ikyēne.” Kangi ako ko kayīlo ka fipānga ikilo iki, Ntwa. Mūmo ifyēne fikupōndwa ifindu ifikulumba, ifyantengo ifi.

Ukumanya ukuti unkulumba Yehova Kyāla, Yūyo abagīle itolo ukutwāla mu. . .Umwēne āyobīle, “Ndwalīla Une utuswi utunini tula.” Umwēne alinkwēga iswi ukuti—ukuti atēndēke ikindukimo nu twēne. Ukunāngīsya, ukuti ubusyūke bwābagīle ukuya kindukimo, ukubōmba ikindukimo nabo. Umwēne akāpelīle iswi syēne mma, lōli Umwēne āpelīle iswi imbīyāno, kangi u nkati umpīyāno. Kangi Umwēne ālyēsīsye maelifu mahano nu tuswi utunini tuhano. . .utumomosela utunini ni swi ibili. O Ntwa, ikyene kyāli maboko Gake, kangi Umwene āli yo Mpeli. Loli Umwene abagīle ukuya nakyo ikindukimo mu kiboko Kyake.

Kyāla, uswe tuli ibīkāga twībēne mmaboko Gāke, ikilo iki, nukuyoba, “O Kyāla, nyēga une mūmo une njīlīle. Kangi akabalilo kāko ubumalikisyo bwa būmi bwāngu buli apa, unko une mbuke nu lusūbīlo ulu lūlo luli nkati mwa une, mmenye ukuti une mbāpīgwe kāngi, kangi u Mbepo Gwāko abīkīle ubukēti na une, nukubīkīla ubuketi na mbepo gwāngu, ukuti une ne mwanundumiana Gwāko, pamo mwanundīndwāna Gwāko.” Kangi ku lisiku ilyabumalikisyo lila, Ugwe kwisakusyusyāga abene mmwanya. Pāga ikyene, Tata.

180 Kangi akabalilo kāko uswe tuli ni mitu gyītu ginamisīgwe, ngimba pabagile ukuyapo yumo abagīle ukufyūsya ikiboko

kyāko, yoba, “Ngumbukilaga une, Nkundwe Branham, mu lwīpúto. Une ngulonda Kyala ukuti āmanye une akabalilo kako . . . bo ngāli une ngasokapo pa kisu iki, ukuti Umwēne isakumanya une fiyo mwakuti Umwēne isakungōléla ingamu yāngu. Une nisa kwāmula.” U Ntwa akusaye ugwe. Kyala akusaye ugwe, kangi ugwe; kangi ugwe, nkikulu. Umunduyumo uyungi? Fyusya itolo ikiboko kyako. Yoba, “Ngumbukilaga une, Nkundwe Branham.” Ikyo kyo iki uswe tukubombága. Kyala akusaye ugwe, nkikulu. Ikyo kyo kinunu.

¹⁸¹ Lilino, akabalilo kāko untu gwāko gwīnamisígwe, kwīpúta, une nguyaga pakwimba ilinandi lwa lwimbo ulu:

Ukunyonywa mma ifyuma ifyaitolo ifya kīsu
iki,

Ifi nakalinga fiyo fikubola,
Yēnga isūbilo syinu pa findu Fyasyēpwa,
Ifyēne fitisakumalikamo siku!

Umilila ku kiboko kya Kyala ikisitakwānduka!
Umilila ku kiboko kya Kyala ikisitakwānduka!
Yēnga isūbilo syinu pa findu Fyasyēpwa,
Umilila ku kiboko kya Kyala ikisitakwānduka!

¹⁸² Akabalilo kāko umwēne ikukina lilino, kangi untu gwāko gwīnamisígwe, ngimba ugwe itolo kufikilága ikiboko kyāko mmwanya, yoba, “Ena, Ntwa, apa kilipo icyāngu”? Ngimba icyēne kisakubomba fiki? Ikyēne kisakunāngisya imbepo yāko, mwa ugwe, yibōmbile ulusalo. “Une ngulonda ikiboko Kyako, Ntwa.” Kyala akusaye ugwe, ndindwāna nini. “Une ngufyusyága ikiboko kyangu.” Kyala akusaye ugwe, undindwana unnini, pāsi apa. Ikyo kyo kinunu, luuki. Kyala, ugwe umenye, asangalwike ukukubona ugwe kubōmba ikyo. “Bitikisyága abāna banini ukwīsa kwa Une.”

¹⁸³ “Une ngulōnda, Kyāla, Ugwe ukukōla ikiboko kyāngu. Kangi pa lisiku lila, une ngulōnda ukuya nkiboko Kyāko; ukuti, akabalilo kāko Ugwe kukōléla, une ngwisakwisága.” Ena, bo yu Lazaro. Kyala akusaye ugwe, kalumbu.

Bo injila yāngu yimalike,
Linga kwa Kyala ugwe gwāli gwabwanaloli,
Akēlu kangu akamulike akāya kāko mu
Lwīmiko,

Umoyo gwāko unyākilígwe gwisakukēta.

Ngimba ugwe kubombaga fiki lilino, polelo?

Umilila ku kiboko kya Kyala ikisitakwānduka!
Umilila ku kiboko kya Kyala ikisitakwānduka!
Yēnga isūbilo syinu pa findu Fyasyēpwa,
Umilila ku kiboko kya Kyala ikisitakwānduka!

¹⁸⁴ Tāta Gwakumwanya, amaboko mīngipo gālīnusígwe mmwanya, nkalukomano akanini aka, ikilo iki, ukuti

abêne bikulōnda ukukoleléla, ikilo iki, ku kiboko Kyāko ikisitakwānduka, ikiboko Kyasyēpwa. Tumeenye ukuti iki kibīkīgwe kwa Ugwe... Ugwe gwāyobīle, “Une... Bosa aba Tata ambele Une bisakwisaga kwa Une, kangi nayumo gwa bēne isakutāgigwāga. Kangi une nisakubafyūsya abēne pa lisiku lyābumalikisyo. Bakabagīla ukupyūtīgwa, bakabagīla ukwīsa ku bulōngi, lōli bali nu Bwasyēpwa, Būmi Bwasyēpwa.” Kangi bulipo itolo bumobwene u Būmi Bwasyēpwa. Ubo bukufumila kwa Kyāla, kwene. Ikyēne yo Kyāla. Kangi uswe tukuya kiyabo kya Kyāla, fiyofiyo nukuti uswe tuli banabalumiana na banabalīndwāna ba Kyāla. Akabalilo kako uswe tuli nu Mbepo gwa Kyala mwa uswe, uswe tukwinogonaga bo yu Kyala. Uswe tukwinogona isya bugolofu nu bwikēmo, kangi uswe tukugela ukuya nu bumi ukunsangalusya Umwēne.

¹⁸⁵ Pāga, Ntwa, ukuti uluko lula ulwa Būmi bwisakwīngīla mu mūndu aligwēsa uyu āfyusīsye ikiboko kyābo. Kangi bala bābo babagīle ukufyūsya amaboko gābo, kangi bakabōmbīle, une ngusuma ukuti Ugwe kwisakuyaga na bēne. Pāga ikyēne, Tāta. Kangi akabalilo kāko ubwēndo bumalike, u būmi bumalike, abēne bali ingilāga mu lutēngāno pisiku lila, nu Mwēne, kūko uswe tutisakukāngalāmo siku, ukuyamo siku babine, ukuyamo siku ulutamio. Mpaka akabalilo kala, tukyungāga uswe basangalafu kangi bahobokeye, ukuntufya Umwēne, kabuno uswe tukusuma ikyēne mu Ngamu Yāke. Amenī.

¹⁸⁶ Mwesa umwe bitiki, lilino, unko uswe itolo tufyūsye amaboko gītu nu kwīmba ingobelo yila.

Umilila ku kiboko kya Kyala ikisitakwānduka!
 Umilila ku kiboko kya Kyala ikisitakwānduka!
 Yēnga isūbīlo syinu pa findu Fyasyēpwa,
 Umilila ku kiboko kya Kyala ikisitakwānduka!

¹⁸⁷ Lilino unko uswe tung’ung’usye ulwēne. Akabalilo kāko umwe mkubōmba ikyo, umpalamani gwīnu, ugwe yoba, “Kyāla akusaye ugwe, mpalamani.” Ponania amaboko nu munduyumo kifuki na ugwe. “Kyala akusaye ugwe.” Pa mbafu sibili-syōsa lilino. Pa mbafu sibilisyo, ponā ifiboko. “Kyāla akusaye ugwe, mpalamani. Kyāla ayēge na ugwe.” “Bika isūbīlo syako pa findu Fyasyēpwa.”

Doc, une mmenye ikyēne kili pala, nkundwe. Une mmenye ugwe gwālīko kula, Nkundwe Neville, iyolo fiyo.

Bo injila yāngu yimalike,
 Kisakubonekaga, limo mwa masiku aga.
 Linga kwa Kyala uswe twāli babwanaloli,
 Uswe twisakumbonaga Nkundwe Seward Kula.
 Akamulike kangi akamulike, akāya kāko mu
 Lwimiko,
 Umoyo gwāko unyakilīgwe gwisakukēta.

Umilila ku kiboko kya Kyala ikisitakwānduka!
 Une nkuganile ukutufya uko, ukufuma pa ndumi.

Umilila ku kiboko kya Kyala ikisitakwānduka!
 Yēnga isūbilo syinu pa findu Fyasyēpwa,
 Umilila ku kiboko kya Kyala ikisitakwānduka!
 Akabalilo kīswīle nifyakwāndu ifyēngo,
 Nakimo ikya kīsu ikisitakugūtīgwa
 kisakwīma,
 Yēnga isūbilo syinu pa findu Fyasyēpwa,
 Umilila . . .

Unko uswe tukōle ubukētelo bwa Umwēne, yula
 unsitakuboneka Yula pakati pitu lilino, kangī itolo
 ukummwīpūta Umwēne lilino bo uswe tukwīmba.

Umilila ku kiboko kya Kyala ikisitakwānduka!
 Umilila ku kiboko kya Kyala ikisitakwānduka!
 Yēnga isūbilo syinu pa findu Fyasyēpwa,
 Umilila ku kiboko kya Kyala ikisitakwānduka!
 Lutengano! Lutengano! Lutengano
 lwakuswigisya,

Mpalaga itolo Umwene lilino.

Ukusuluka pāsi . . .

Indumi yimalike. Ulwene lo lutūfyo.

Pyāgilāga pamwanya pa mbepo yītu
 kwabwīlanabwila, une ngusuma,
 Mmayiga amasitakupimigwa ga lugāno.

Itolo oga mwa Umwēne.

Lutengano! Lutengano! Lutengano
 lwakuswigisya,
 Kwisa pasi ukufuma . . .

Yila ingulumba i Nyībúko, Iyēne yikwīgúka mōsa.

. . . kumwanya;
 Pyāgilāga pamwanya pa mbepo yītu
 kwabwīlanabwila, une ngusuma,
 Mmayiga amasitakupimigwa ga lugāno.

Ngimba ikya itolo kitikubōmba ikindukimo?

. . . Lutengano lwakuswigisya,
 Lukusuluka ukufuma kwa Tata Mmwanya;
 Pyāgilāga pamwanya pa mbepo yītu
 kwabwīlanabwila, une ngusuma,
 Mmayiga amasitakupimigwa ga lugāno.

Ngimba kikayapo ikindukimo ikya Ikyēne, itolo kikabi kangī
 kinyafu?

¹⁸⁸ Nguswīga linga alipo umūndu umbine ikulōnda ukupakígwa
 nukwīputilígwa. Linga alipo, itolo bwāga ubuyo bwāko.

Uyu yo nkikúlu nkikota kyamagudumu pala? Itolo unko umwēne asyāle. Une ngwīsa, ngummwīputíla umwēne. Umwēne atisakufīmbilisígwa ukusumuka mmwanya ukufuma mu kikota. Uyungi?


O, ngimba umwe itolo mutikukigana ikiyabo iki ikya lukomano? Balinga bikwīpilika, itolo bikumanya ukuti u Kuyapo kwa Kyāla kuli apa? Ikyo kyo iki une nguyoba. Ikyo kilakila... Ugwe kwīpilika itolo ngati... Balinga bikwīpilika ngati ugwe ubagīle itolo ukulata pānja? Lilino unko uswe itolo tukēte. Itolo kikipilikígwa ngati ikindukimo mwa ugwe kikulōnda ukulāta pānja. Muketile?

Ikyene lo lutengano! Lutengano! Lutengano
 lwakuswigisya,
 Lukusuluka ukufuma kwa Tata Mmwanya;
 Pyāgilāga pamwanya pa mbepo yītu
 kwabwīlanabwila, une ngusuma,
 Mmayiga amasitakupimigwa ga lugáno.

Baka pa une,

¹⁸⁹ Akabalilo kāko uswe tuli mu mmapalo, uswe tukuyaga pakupaka ababine lilino, nukwīpūtila abēne. Ngimba ugwe utikwisaga kunokuno injila iyi, nkikulu?

¹⁹⁰ Ngimba iki kitikusanusya fiki? “Ulwiputo lwa lwitiko lwisakupoka ababine.” Aligwēsa mu lwīpúto lilino, itolo ng’ung’usya ulwīmbo lula. Inogona isya Yeso ikubumbulusya ababine.

Mōnelelāga umwēne mmafuta...?... 

57-0821 Bahiburi, Untu Gwākwānda
Kitembe Kya Branham
Jeffersonville, Indiana U.S.A.

KYANGONDE

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Ukusasania isya kwegwelelakwegelela

Ukusoka isya kwegwelelakwegelela. Ubwabuke bosa bukanisigwe. Ilibuku ili libagile ukubindikisigwa mfikalatasi pa kompyuta ya kunyumba ukuti ufibombelege imbombo yuyugwe pamo ukubayabilako abangi, kisita kuhombigwa, fiyege fyombo fyakubombela imbombo pakusasania Inongwa inunu isya Yeso Kristi. Ilibuku ili likabagila ukuulisigwa, pamo ukubindigwa ukuti gayege mingimíngi, pamo ukusanusigwa pa webusaiti, pamo ukubikigwa mmakina agakusungasunga, pamo ukusanusigwa mu ndimi isingi, pamo ukulibombela imbombo iyakusyagilamo ihela kisita kwitikisigwa mwakalata unsimbigwe ugwa Voice Of God Recordings®.

Linga kulonda upilike inyingi pamo ifyombo ifingi ifi filipo ulisimbilaga ku:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org